

Jesu'walaŋ Mede Momoon Makdi Youkuk Yodakale Mede

Mak adi Mede Momoon youlene nadiŋa baigoŋ nadidakaleeŋ medeŋiŋ diniŋ daŋiniŋ indiŋ kameeŋ youkuk: “Jesu Kilisto Bepaŋ Mihiniŋ'walaŋ Mede Momoon.” Jesu adi mede hogok mu yoluguk, adi yadi mede yoŋa kunumneniŋ kudi wanaŋ pilap saŋiniŋnit hinek tuluguk. Indiŋ tuluguk. Metam Mede Momoon yenindidimeluguk, agoŋ yabap moihi yeninkelelutuguk, agaŋ metam kadakaninŋ titiŋ kadakaninŋhik tumolokutuguk, tiŋa adi kwetfoloŋ me'walaŋ mihi tuguk, kwetfoloŋ metam hogohogok indi kadakaninŋ, kumuŋ eŋ Sadaŋ'walaŋ folok fafaŋeniŋ gineŋ hatigumun u fiyakutnimuŋa ninigila beŋa Bepaŋ netok mebit nipmeguk. Unduŋ doktiŋa indi nai indidegoŋ Jesu nadisukilitimiŋa Bepaŋ ne'walaŋ wapmihiniŋye hinek hatiyam.

Mak adi unduŋ tiŋa Jesudi Mede Momoon yoluguk wondok adi haŋaŋiŋgoŋ youkuk, eŋ Bepaŋ'walaŋ saŋiniŋ foloŋ kunumneniŋ kudi tuluguk wondiniŋ mede kahat adi gibita hinek tiŋa youkuk. Unduŋ tiŋa yeguk e' tububihila Jondi Jesu Imeyout timiŋguk eŋ Sadaŋdi tika-manda timiŋguk agaŋ kwanai tububila Mede Momoon yohautaguk eŋ Bepaŋ'walaŋ saŋiniŋ foloŋ kunumneniŋ kudi tuguk kaŋ metam Jesu keleeŋ

yaugin̄di Jesu adi biyagon̄ hinek Bepan̄ mihin̄in̄ kakiyondagin̄ dinin̄ kahat youkuk.

Ingon̄ e', Jesu memikniye adi yadi welekwambun̄ hinek tin̄a mede ginen̄ kameen̄ kolon̄dabek folon̄ ulukumun̄a wenefulagin̄, ingon̄ Bepan̄'walan̄ san̄inin̄ folon̄ kotigon̄ kaikan̄ pilakuk wondinin̄ kahat youkuk.

Mak'walan̄ kahat dikinen̄ mede fek indinin̄ [] ginen̄ hatak uyadi Mak negon̄ youkuk be mu youkuk u mintadakale hinek mu tilak. Wondok adi nadinadime nolidi kougon̄ kiyonadi tiin̄.

Mak'walan̄ mede dinin̄ yohebet

1:1–1:13 Mede Momoon̄ dedin̄ tububihikuk

1:14–9:50 Jesudi Galili kwetnen̄ kwanain̄in̄ tububihikuk

10:1–10:52 Galili kwetnen̄ tububihila titawoon̄ Jelusalem usuwaguk

11:1–15:47 Jelusalem en̄ yokwet magimagi ilaugin̄ ginen̄ kwanai tuguk

16:1–16:8 Jesu kumun̄ ginen̄in̄ kaikan̄ pilakuk

16:0–16:20 Wapum adi mintahebi tin̄a hatigene kunum ginen̄ loguk

Jon Imeyout Tububihit'walan̄ kahat

(Matiyu 3:1-12; Luk 3:1-9, 15-17; Jon 1:19-28)

¹ Bepan̄ mihin̄in̄ Jesu Kilisto dinin̄ Mede Momoon̄ ² adi polofet Aisaiyadi koom youkuk undugon̄ hinek tububihila mintaguk. Aisaiyadi indin̄ youkuk, “Nu kwanai-mene kamewe timen̄ woon̄ talik dobui tigambaak. ³ Adi kwet fiilen̄ indin̄ kutilak: Wapumdok tiulidoko tinen̄ tin̄a talik figumotaan̄ iminnen̄.”

⁴ Undun youkuk kan biyagon hinek Jondi kwet filen buja Imeyout kwanai tinja metam indin yenhautaluguk. “Hidige, kadakaninhik sigilulum tiyeminja buune Imeyout tihambene Bepandi kadakaninhik tumolokuhambek.” ⁵ Undun yonja tubu metam fee Judiya maanen en Jelusalem yokwet wapum maanen itawagin adi Jon medenjin nadine ugin. Woon kadakaninhik yofiyalu Jodan ime ginen Imeyout tiyemuluguk. ⁶ Tinahukutnin adi kale kamel* dumunin di tigin, en kiyegelepnin adi kale gitnemdi tigin wendi gadinin folon youkilitiguk. Nanae adi gwatak dut siminkupuk naan hatiguk. ⁷ Undun tinja itauna metam indin yeniluguk, “Me nin kougou baak adi lolon nit, nu nalakapmen tilak. Nu aindinin di tipilapilaye timindok tuwot mon. ⁸ Nu adi imedi Imeyout tihamulat, ingon adi yadi Ungonin Munabulidi youhambaak.”

Jesu Imeyout tuguk kan Sadandi tikamanda timinguk

(Matiyu 3:13-17; 4:1-11; Luk 3:21-22; 4:1-13)

⁹ Undun yonila Imeyout kwanai hati tulu helenin Jesu Galili kwet wapumnen yokwet nin Nasalet u binja buune Jondi Jodan ime folon Imeyout timinguk. ¹⁰ Imeyout timimbu labuna maginen yali dadiyeen kaune kunum dilitombu Ungonin Munabulidi butigili wele tinja fominguk. ¹¹ Foon fotokomimbune yali nadilu kunum ginenin mede nin indin foguk. “Du adi na’walan

* **1:6:** Kale won adi gawangawan hogok tinja sigin folon bombon. En meenin maan ungon loon ilu yanagila talik kweetnin yawiin.

mihine hinek, welenedi hinek gabukahilelat. Nu nadigambe utumba hinek tilak.”

¹² Nai unjaningon pilap hinek Ungonin Munabulidi nimbune kwet filen woon helebufa 40 hatiguk, ¹³kwet u kale moihi, mikhinit hatiyaginjen uguk. Unon woon hatilune Sadandi kadakanin titindok tikamanda timinguk. U tubudapmaune anelo hekidi buna tubulodagin.

Jesu kwanainin tububuhit tinila mihiniye yanagikuk

(Matiyu 4:12-22; Luk 4:14-15; 5:1-11)

¹⁴ Jon agan yot fafaneninjen kamegin kan Jesu Galilide woon Mede Momoon yoyo tuguk.

¹⁵ Indin yoguk, “Bepan’wala Hatihati Kobulidi agan hehitubu-dulalak doktina kadakaninhik sigilulum tiyemina Mede Momoon hogok nadisukilitiyaneen.” ¹⁶ Undun yona Jesu Galili Imengwan magi hogok woon Saimon dut kwayan Endulu yabuguk. Adi adi pisi mongomongot yakat doktina imengwan ginen umbenhik kukut hati tulu

¹⁷ Jesudi woon yeninguk, “Buna nu nehikeledemek kan metam yahanedok hanindidimewit.”

¹⁸ Undun yenimbune nai unjaningon umbenhik ungon biyabuna Jesu kelegumuk. ¹⁹ Kabe muninin uyen meyat lufom ninbo yabuguk, u Sebedi mihiniyat, Jems tin kwayan Jon. Adi muwage folon loon ila umbenhik ha tutumbagumuk ²⁰ kan Jesudi yabuna kutiyenimbu behik Sebedi adi tipilapilaye-me heki dut muwage folon ungon biyabuna adi Jesu kelegumuk.

*Jesudi Kafanaum yokwetnen kwanai tuguk
(Luk 4:31-37)*

²¹ Jesu tiŋa me noli maan adut Kafanaumde ugin. Woon hatina Sabat nai nin folon Judahi'walaŋ bopyotnen foon Jesudi Bepaŋ'walaŋ mede yenindidime tuguk. ²² Adi Yodoko Mede hinale hekidi yoyagin undun mu yoguk. Adi yadi mede molomdi fulunŋon hinek yoguk doktiŋa metamdi nadiŋa boho tigin.

²³ Mede Momoon yayolu me nin yabapnit bopyotnen unŋon ikukdi yakawe toŋa indin yoguk. ²⁴ “Jesu Nasaletnin, du manŋon tinimbe buŋaŋ? Du nihitubu-kadaka be tibe buŋaŋ? Du Bepaŋ'walaŋnin me unŋonin u agaŋ nadigamulat.”

²⁵ Undun tobune Jesudi yabap indin nintoguk, “Kabup. Mede wabiŋa me u welen maanenŋin labubuŋa wen.” ²⁶ Undun nimbune yabapdi me u gibita mahamulaŋa yakawe wapum toŋa labubuŋa uguk.

²⁷ Kaŋ metam adi u kaŋ boho tigin. Tiŋa, manŋonti undun tilak yonŋa nehi unŋon indin yonadigin. I hinale kwanai nadinadi kobuli bidak tiŋa bu tilak. Me ya yabap heki mede saniniŋnit hinek yenimbu medenŋin nadimiin. ²⁸ Undun tubune gigitŋindi Galili maanen kwetkwet huta-dapmaguk.

*Jesudi metam fee yehitubu-kedebaguk
(Matiyu 8:14-17; Luk 4:38-41)*

²⁹ Jesu tiŋa mihiniye adi bopyotnenin fakan foon woon Saimon dut Endulu yohinen ugin.

³⁰ Wosuwaune niŋgin, “Saimon yapman tam adi

foloon kudup daune yopman deihatak.” ³¹ Undun ningin kan Jesudi woon kohon ginen honeune kedebaan pilali ikuk. Pilali nanane nonjon nanandok yona tiulidokoune nagin.

³² Ala tebele mele fohebidok tulune metam nohiye yagithinit be yabaphinit u yanagila Jesu’wala bugin. ³³ Metam fee buja bopnegin, noli hogok kwanainin kane bugin. Buja fakan bopnegin ³⁴ kan Jesudi metam yagit mebimebihinit yehitubu-kedebaan noli yabap kadakaninhinit u yehikeleyemguk. Undun tubune yabap heki kwanai u Jesudi tilak u agan nadigin doktina yohautanenen yona yenihep tuguk.

*Jesu Galili maanen Mede Momoon yoyo tuguk
(Luk 4:42-44)*

³⁵ Heleune hani timin Jesu pilali yokwet wapum bikabuja behepnen mehinek mokitnen woon Bepan ha ninadiguk. ³⁶ Haninadilune Saimondi me noliniye yanagila lohitaugin. ³⁷ Lohitawoon kan ningin, “Metam golohi tiin.”

³⁸ Nimbune yeninguk. “Yokwet nolinoli ginen woon Mede Momoon yenyenin unon maan tibit. Nu kwanai wendegon bugut.” ³⁹ Undun yona Galili kwetnen Judahi’wala bopyot yaliugin indigon tuwot yaudapmaan Mede Momoon yohauta tina yabap kadakahi yehikeleyauguk.

*Jesudi me nin wede hakinit tubukedebaguk
(Matiyu 8:1-4; Luk 5:12-16)*

⁴⁰ Undun tiyaulu me nin wede hakinit adi Jesu’wala woon mulelem timina tubulodadok

yo indin ninguk. “Da nadilan, nehitubu-lodawe kan kedem nehitubu-kedebawen.”

⁴¹ Undun yobu Jesudi kan bulaningon nadinā kohon kihiwali honeen ninguk, “Kedem nadigamulat ale walandawen.” ⁴² Undun nimbu foloon walandaguk, kan ⁴³ nihep tinā indin ninguk, “Metam mu yenimbihilen. ⁴⁴ Silonyot dinin talitimen’wala didimengon wen kan gabunadiwek. Kan metamdi gabuna agan kedebanan undun nadinen dok wen, woon koom Mosesdi yoguk undun Bepandok kale dumun hemundumundune timimben.” ⁴⁵ Undun ninguk ingon me i woon kwanai u mu tuguk. Adi woon kahat yohautaguk kan metam mohokdi Jesu’wala uneen doktinā Jesu adi yokwet wapum maanen mehinek fee ginen fofondok mon nadinā, kwet mehinek mokitnen woon halune mehinekdigon tobonin woon kayagin.

2

*Jesudi me nin kayon kumin tubukedebaguk
(Matiyu 9:1-8; Luk 5:17-26)*

¹ Helebufa noli dapmaune Jesu koti Kafanaumde uguk. ² Uune metam feedi kahatnin nadinā bua Jesu yoline bopnegin. Yotmaan u tuwot tubune noli talik yeyemen yakin. Kan Jesudi Mede Momoon yayenilu ³ me lulufufomdi me nin kayon kohon kumuhi, talik mu yauluguk bemna bugin. ⁴ Bemna bua Jesu heben ginen kamen dok banam mon kan me u koti bemna yot folonin login. Loon Jesu yakuknen didimenin kitomuna me u gulupnin folon halune kapmau

foguk. ⁵ Foune Jesudi nadisukilitihik kanadi bilaten ninguk, “Mihine, kadakaninge aganj tumolokutat.”

⁶ Undun yoguk kan Yodoko Mede hinale heki adi nadinadihik ginen indin nadisugin, ⁷ “Me i dedin doktina mede undun yolak? Kadakanin bibin adi Bepandi hogok tilak. Ya Bepanj’walan kwelikon tilak.”

⁸ Undun nadisugin kan Jesudi nadisuhik u aganj kan yeninguk. “Hidi nadisu undihi mangonde tiin? ⁹ Me kayon kohon kumuhi i mede longon dedin ninindok? Kadakaninge tumolokutat. Be pilali gulupge mongola wen. ¹⁰ Undun doktina, Me Kobumun nu kwetfolon inon kadakanin bibindok saniningne hatnamulak u tibe kanen.”

Undun yeninga me kayon kohon kumuhi u indin ninguk ¹¹ “Nu ganilat. Pilali gulupge mongola yokede wen.” ¹² Undun nimbune metam yakaune me u pilali gulupnin mongola yolide uguk, kan metandi koom nemek indinin nemu kagumun yonja Bepan niutumba tigin.

Jesu me kadakahi dut nananje nagin
(Matiyu 9:9-13; Luk 5:27-32)

¹³ Helenin Jesu Galili imengwan maginen kotigon uguk kan metam feedi kane bugin. Bune kotigon Mede Momoon yeniyenin tuguk. ¹⁴ Undun tina ime magi tebe hogok woon Alifiya mihinin Lewi takis muneen mongomongot me adi kwanai yotnen itune kan ninguk. “Nehikelewen.”

Undun nimbune adi pilali keleguk. ¹⁵ Undun tina loon Lewi yoline nananje ila nalune me takis muneen mongomongot fee en metam kadakanin

titin noli wanakan buña Jesu tina mihiniye yehitomboyola nanane nonjon ila naging. Me undihi feedi Jesu takaliyagin doktina buña yehitomboyoukin. ¹⁶ Kan Falisi mebop'walaanin Yodoko Mede hinale heki adi Jesu me kadakahi dut nanane naguk u kan mihiniye indin yeninadigin, “Jesu adi detina nanane me indihi dut nalak?”

¹⁷ Undun yonadigin kan Jesudibo medehik u nadin indin yeninguk, “Haguwo-me adi metam kedahi mu yehitubu-lodalak. Adi metam yagithinit yehitubu-lodalak. Undugon nu maan me fofohi lolonhinit yehitubu-lodadok mu bugut. Nu adi me kadakanin titin yehitubu-lodadok bugut.”

*Jesu nanane kamehepdok ninadigin
(Matiyu 9:14-17; Luk 5:33-39)*

¹⁸ Jon Imeyout Tububihit mihiniye en Falisi heki adi nai nin nanane kamehep tina hogok hakin. Kan metam nolidi buña Jesu ninadigin. “Jon Imeyout Tububihit mihiniye en Falisi heki mihiniye adi nanane kamehep tina halune du'wala mihigeye adi dedin doktina nanane kamehep mu tin?”

¹⁹ Undun ninadiune Jesudibo yeninguk. “Me kohokukut titindok adi hinamuni ginen ungon halu me nanane nanadifodok bunen adi nanane kamehep kedem be tinen? U tuwot mokon. Me hinamuni molom nongon halune nanane kamehep u tuwot mu tine tin. ²⁰ Hatigene me wapumhik yolom nagilune kan nai unanin nanane kamehepa map hatineen. ²¹ Nebek nin di haule kobuli dobuña dahidahi komi folon tuwot mu

tibine galiwek. Undun tubune adi haule kobulidi komi hamaneune dahidahi komi u hamanjon bulagnewek. ²² Be nebek ninji wain ime gitipmun tutumbaar kale gitnemdi ime tout tibineyagin unolok komi ginen tuwot mu ugolowek. Undun tibek adi waindi tout komi tubutawaan kwatnewaaknen doktina wain kobuli adi tout kobuli ginen hogok ugolodok.”

Sabat dinin mede

(Matiyu 12:1-8; Luk 6:1-5)

²³ Sabat folon Jesu adi mihiniye dut wit fiye ginen-talik ugin. Unila unila mihiniye adi wit foloon wootitiit tigin ²⁴ kan Falisi hekidi yabu tuwot mu tubune Jesu indin ninjin. “Yodoko Medenikdi Sabat folon kwanai mu titindok yolak kan hidi mangonde undun tiin?”

²⁵ Undun yobu adibo indin yeninguk, “Hidi koom Abiatadi Silonyot dinin talitimen hatiluguknen Dewit tina mikmeniyedi map nadin tigin u mube kunali nadin? ²⁶ Dewit adi woon Bepan’wala Silonyotnen foon Bepandok belet ungonin yona kamegin u tina naan mikmeniyeye yembune nagin. Kan Yodoko Medenikdi undun mu titindok yonit, adi me talitimenji hogok nanandok yonit.”

²⁷ Undun yeninga indin tomboyoola yeninguk. “Sabat adi mehinek yehitubu-lodadok kameguk, en mehinekdi Sabat tubulodadok mu kameguk. ²⁸ Undun doktina Me Kobumun adi Sabat maan kadokolak.”

3

Jesudi Sabat folon me nin tubukedebaguk (Matiyu 12:9-14; Luk 6:6-11)

¹ Nai ninde Jesu kotigon Judahi'walañ bopy-otnen foguk, kan me nin kohon kumon tuguk adi maan ungon ikuk. ² Kan me noli adi Jesudi me u Sabat folon nobu tubukedebau kan mede ginen kamen dok yona yamangon ila kakuwakin. ³ Kan Jesudi me kohon kumin u ninguk, "Pilali ingon laben." ⁴ Nina metam yeninguk, "Yodoko Medenikdi Sabat folon dedin titindok yolak? Meenin yehitubu-lodadok be yehitubu-kadakadok yolak. Be meenin hatihatihik tomboy-ouyemdok be yehitubu-kadakayemdok?" Undun yenimbu metam adi mede mu yona hogok ikin, ⁵ kan Jesu adi yabuna kwihita tuguk. Tina undugon welekwambun tigin doktina welemulap tuguk. Undun tina me kohon kumin u ninguk, "Kohoge kihiwalen." Undun nimbune kohon kihiwalune utumbahinakaguk. ⁶ Kan Falisi heki adi Helot'walañ mebop dut woon bopnen Jesu uutdok yona yohebet tigin.

Metam Galili Imengwan gagayen bopnegin (Luk 6:17-19)

⁷ Jesu mihiniye dut Galili Ime luhinen ugin kan metam feedi yehikelegin. Metam u yadi Galili, Judiya, ⁸ Jelusalem, Idumia, Jodan ime fokolok mele labulabunenkade, agan Taiya dut Saidonkade bugin. Metam unahi adi Jesudi kwanai tuluguk dinin gigitnin u nadin bugin. ⁹⁻¹⁰ Kan mehinek fee yehitubukedebaguk kan noli yagithinit adi buna wehemila

kedebadok yonʼa kwanaimin tigin. Undun tinʼa bu tubukapepene tinenen yonʼa mihinʼiye yenimbune muwage tiulidokomingin. ¹¹ Undun tubune yabaphinit adi bunʼa heben folon ungon maan hali indin niyagin, “Du Bepan mihinʼin.” ¹² Undun niyagin kan Jesu adi yabap heki fafanengon yenihenʼa adi nedigon hinek u mu yobihitdok mon yeniheluguk.

*Jesudi mihinʼiye 12 yabukahileen yanagikuk
(Matiyu 10:1-4; Luk 6:12-16)*

¹³⁻¹⁴ Jesu kweboboe folon loon me ne yabunadiguk u kutiyenimbu ugin kan me 12 hogok negut hatidok yabukahileen yanagila wohik Aposel yeninguk. En Mede Momoon yoyo tiyau dok yeninʼa ¹⁵ yabap yehikeledok sanjin maan yemguk. ¹⁶ Me yanagikuk u wohiye indin: Saimon (Jesudi wou Pita ninguk), ¹⁷ Sebedi mihinʼiyat Jems dut Jon (Jesudi wohik Boanes yeninguk, mebi munʼkulap me), ¹⁸ Endulu, Filip, Batolomi, Matiyu, Tomas, Jems Alifiya mihinʼin, agan Tadiyas, Saimon Selot, ¹⁹ agan Judas Kaliotnin (adi hatigene Jesu bolik timinguk).

*Jesudok welelufom tigin
(Matiyu 12:22-32; Luk 11:14-23; 12:10)*

²⁰ Undun tinʼa Jesu yopmande uune metam feedi kotigon bunʼa bopnegin. Undun dok-tinʼa Jesu adi mihinʼiye dut nanane nana dok banam nemu mintaminguk. ²¹ Undun tubune menimeniyedi u nadinʼa nadibubuye tilak yonʼa nagitne bugin.

²² Kan Yodoko Mede hinale Jelusalemhi bugin adi indin yogin, “Yabap heki’walaŋ wapumhik Belisibudi tubulodaune yabap yeninŋkuyaulak.”

²³ Undun yobune Jesudi kutiyenimbu buŋa bopneune yoyout mede indin yeninguk, “Sadan adi Sadan deti kelekulek. ²⁴ Kwet wapum ninŋdi utawaan bop molomolom tinŋa mindobune kwet u kadaka tibek. ²⁵ Be me hekinolit ninŋ adi daneen molomolom hatinŋa mindobu tubune lekingonhik folon utawautawa halune kadakawetik. ²⁶ Undun doktinŋa Sadan adi undugon, utawaan bop lu-fom tinŋa mindobu tubune adi maan kwanaininŋ kadakalak.

²⁷ “Nebek ninŋ me fafaŋenin’walaŋ yoli ubulagineen bombon kubo timimbe nadinŋa timenŋ yot molom u tawa tinŋa ibikilitiune halune yoli kadem ubulaginewek. ²⁸ Indin hanindakalewe nadinenŋ, metam hidi kadakaninŋhik be mede kadakaninŋ yoinŋ u Bepanŋdi kadem bihambaak, ²⁹ inŋonŋ nebek ninŋ mede kadakaninŋ Unŋoninŋ Munabulidok nimbaak adi yadi kadakaninŋninŋ mu dapmawaak. Adi kadakaninŋ fafaŋenŋ hinek tibaak doktinŋa kadakaninŋninŋ u hali woonŋ halaak.”

³⁰ Metamdi yabapnit yaulak ninŋinŋ doktinŋa undun yeninguk.

Jesu minŋ kwayanŋiye

(Matiyu 12:46-50; Luk 8:19-21)

³¹ Undun tinŋa hatu Jesu minŋ kwayanŋiye wosuwaan fakanŋ yali, fakanŋ fofondok mede kamemimbune loguk. ³² Kan metamdi ninŋinŋ, “Manŋe kwayageye mede ganine fakanŋ woomgamiinŋ.” ³³⁻³⁴ Undun ninŋinŋ kanŋ metam

adut ikin yabuna indin yeninguk. “Mane kwayaneye nedigon? I kainbe? Hidi i ikin, hidikuyen nu’wala maneye, kwayaneye en witneye. ³⁵ Metam nediye Bepan’wala manin mede nadin takalin adi yadi nu’wala maneye, kwayaneye en witneye tin.”

4

*Jesudi yoyout diniyeti ginen kamekaan yoguk
(Matiyu 13:1-9; Luk 8:4-8)*

¹ Jesu kotigon imengwan gagayen woon Mede Momoon yeniyenin tuguk, kan metam feedi woon bopnegin kan muwage folon loon ila ² yoyout mede folon mede fee yeninguk. ³ Nin e indin, “I nadinen, me dinina molo nin adi nemek yeuli yetibe mongola uguk. ⁴ Monggo woon sayoli kilik kukam undun kukuk. Kulune noli talipmen magin kan bagi hekidi kunatnagin. ⁵ Noli kwet kawadenit folon maan kwet wahingon doktina pilap kadogin. ⁶ Ingon kokoihik fulungon mu fogin doktina mele diween kawade dafafaneune kumun tigin. ⁷ Kan noli hanginep maanen maan labugin ingon hanginepdi hefulaune foloon mu tigin. ⁸ Noli kwet galikit folon magin adi kedem labuna folohik fee duhugin. Tina kwedei nin dinin foloon 30, noli dinin 60 en noli dinin 100. Undun mintagin.” ⁹ U yenindapmaan indin yeninguk, “Nebek nin adi nadidakalewe kan magi baigon kametnadin nadiwek.”

*Dedin doktina yoyout ginen hogok mede yohau-
talak yona ninadigin
(Matiyu 13:10-17; Luk 8:9-10)*

¹⁰ Jesu nehogok halune, me noli adi mihinjiye tuwelupdut nonjon woonj ila yoyout mededok ninadi tigin kanj indin yeninguk, ¹¹ “Bepanj’walañ hebenj folonj Hatihati Kobuli dinin mede hebinin hatak u Bepandi aganj hanimbihitak. Kanj me noli fakankade hatiin adi yoyout mede folonj kamekaan yenilat, ala

¹² ‘Adi kanim yo kainj ingonj tuwot mu kadakalein, enj nadinim yo nadiin ingonj tuwot mu nadidakalein. Tina kadakaninhik sig-ilulum tiyembune Bepandi tumolokuyem-baakneñ.’ ”

Jesudi yoyout diniyeti ginenj kamekaan yoguk dinin mebi

(Matiyu 13:18-23; Luk 8:11-15)

¹³ Tina indin yeninguk, “Yoyout i mu nadidakaleen yoyout noli dedin tina nadidakalenen? ¹⁴⁻¹⁵ Mebi adi indin. Metam noli adi kiliki talip-menj maune bagidi bu nagin undun tiin. Me Mede Momoonj yoyo tilak adi mede yobu nadiin ingonj pilap hinek Sadañdi buña mede momoonj u yolom mongotak. ¹⁶ Metam noli ninj adi kiliki kwet kawade folonj kukuk undihi. Mede nadinja nadi-galika hinek tiin ¹⁷ ingonj welehik maanen hinek mu mongokiin doktina Mede Momoonj dinin mik-kwadi buune pilap hinek main. ¹⁸ Metam noli adi kiliki hanginep ginenj kukuk undihi. Mede nadiin ¹⁹ ingonj onj, hatihati kwetfolonj dinin nadibedi wapum hinek tiin. Welehik wapum muneen bombondok yatak wondi Mede Momoonj nadiin u kelekulu adi hogok hatifit tiin. ²⁰ Kanj noli adi kiliki kwet fofoonnenj kukuk undihi. Adi

yadi mede nadiņa boihatiņa foloon fee yehitubu-mintain, nolidi 30, nolidi 60 en nolidi 100.”

Hauta galiņa kufula mu titiņdok
(Luk 8:16-18)

²¹ Kotigon tomboyoula indin yeninguk, “Hidi, kaman galiņa kufula mu tiin. Mon hinek. Tobo galiņa folonin mingon kameune ila hautalak. ²² Nemek kabup hebi hatak u hakene naininde mingon mintawaak. Nemek tumut ginen hatak u hakene naininde fiyatanakiyekulune mingon mintawaak. ²³ Nebek nin nadidakalewene kan magi kametnadi baigon tibek. ²⁴ Mede i nadiin u gitagon hinek nadihinakanen. Hidi metam nolidok tuwolit dediningon yemaneen kan Bepan adi u kan kabe-kalakapmeen wapumgon hamuluwaak. ²⁵ Biyagon hinek, nebek nin adi nemek mingin u behatibukan tomboyoulimimbaak, en nebek nin adi nemek mingin u mu behatibukan lomtubune hogok hatiluwaak.”

Mede Momoon mehinek welehiik maanen kwanai tilak

²⁶ Undun yeniņa kotigon Bepan’wala hatihati kobut dediningon u yoyout mede folon indin yeninguk, “Me nin adi hangom kilik kwetfolon kamelak. ²⁷ Kameen hatibu helebufa debek uune hangom kilik adi tawaan labiin. ²⁸⁻²⁹ Undun tubu me i debekti labiin u mu nadiņa hatilu loon foloon tiin. Timen boki labusuwaune, mebi mintaan ilune mindan kitili mintaan loon foloon tiņa gilakaune nanaņdok nai tilak kan woon datak.”

*Hatihati kobulidok kigili mede
(Matiyu 13:31-32; Luk 13:18-19)*

³⁰ Undun yeniņa indin yeninadiguk, “Bepañ’walaņ Hatihati Kobuli u dediniņ yonim? Yoyout maņgoņ foloņ kamekaañ yonene dakalewek?” ³¹ Undun yoņa indin yeninguk, “Bepañ’walaņ Hatihati Kobuli adi mastat kilik* dabugoņ. ³² Kiliki woņ adi kuyahi-kabe hinek, kiliki noli yetiyam wendok tuwolit moņ. Ingoņ mindaņ mastatdi looņ wapum tiņa nemenemek noli yetiyam u yalakapme tiņa yalune bagi heki adi buņa taņeniņ foloņ uņgoņ deipilat tiin.” ³³ Metamdi nadidakaleneņ yoņa Jesudi yoyout mede fee hinek yeninguk. ³⁴ Adi mede didimeņgoņ be mingilangoņ nemu yeniluguk. Adi yoyout mede foloņ hogok kameeņ yeniluguk doktiņa mihiniye adi nehogok hatugukneņ woon kaune mebi yenindakaleluguk.

*Fifingobut dut imedi Jesu’walaņ medeņiņ
nadigumuk
(Matiyu 8:23-27; Luk 8:22-25)*

³⁵ Nai wondok folongoņ mele folune Jesudi mihiniye ime fokolok uundok yeninguk ³⁶ kaņ metam bop wapum u biyabuņa muwage Jesudi looņ yali Mede Momoon yeningukneņ uņgoņ looņ noņgoņ ugiņ. Jesu ne agaņ koom looņ ikuk doktiņa mihiniye hogok looņ ilune noņgoņ ugiņ. Muwage noli maañ noņgoņ ugiņ ³⁷ kaņ fifingobut wapum tiņa ime giyondaañ buņa muwagehik gineņ fotokiwe tuguk. ³⁸ Kaņ Jesu adi mebi ulolon

* **4:31:** Mastat adi pepa yendiniņ Diksineli gineņ uņoņ kaweņ.

kameen mindan gwan gitagon damo deihakuk. Tubune mihinje adi munta tija woon talam-sukuleen ningin, “Hinale, indi agan ime ginen wopmabutne tam kan du inditok nadibedi mube tija gitagon deihatan?”

³⁹ Undun nimbune Jesudi pilali yali sububa nihep tija ime indin ninguk, “Ime, du kuleman fohat.” Undun yenimbune fifingobut wabiune ime maan kulemaan fohakuk, ⁴⁰ kan Jesudi yeninguk, “Munta mangonde tiin? Hidi nadisukilitihik mon be?” ⁴¹ Undun yeninguk kan munta kisan tija yogin, “Me i dedinin doktija sububa dut imedi medenin nadiyamuk.” Undun yo nehi ungon kisan yonadigin.

5

Yabap heki makaye welehik ginen fogin
(*Matiyu 8:28-34; Luk 8:26-39*)

¹ Undun tija Galili Imengwan fokolok, Gelasa kwetnen wosuwagin. ² Wosuwaan tatakula foune me nin yabapnit meytnen itoulugukdi kawe buguk. ³ Me u nebek nin di tawa fafajendi (sen) tehiwekdok tuwot mon. ⁴ Tawa fafajendi tehiyagin ingon tubudoko tuluguk en yot fafajeninen kameyagin ingon ubulagineen labu yauluguk. ⁵ Helebufa indigon meytnen en tuwai folon yauna yakawe toja foloon kawadedi dobudobu tuluguk. ⁶ Adi kweetningon-kabe yali Jesu kan kiyane buna mulelem timinguk ⁷⁻⁸ kan Jesudi yabap nin kulune yakawe kadakanin toja tubune me wondi Jesu ninguk, “Jesu, Bepan Lolonit Mihin, du mangon tinambe bulan? Nu

Bepañ namanda folon ganilat, folofigita kisanjon mu namben.”

⁹ Undun yoguk kan Jesudi ninguk “Du wohoge neen” nimbune yoguk “Indi yabap feegon dok-tinǝ wotniniye Me Mohok”.

¹⁰ Undun yobune Jesudi yehikeleune kwet ninǝkade uundok mon ninǝin, ¹¹ adi makaye mohok kweboboe hapmenen yamanjon unjon yabudokoyagin ala yeninǝkulu unjon lolondok mede kwanai tigin. ¹² Indin nimbulabulayeen ninadigin, “Kedembe ninimbune loon makaye heki welehek maanen fonim?”

¹³ Undun ninadigin kan yeninǝkulune mehinek ginenin fobunǝ woon makaye heki welehek maanen fogin. Founǝ makaye unjon hakin hogo-hogok yokunathik 2 tausen u kiyaneeñ woon maham ginen tatakula ime ginen foon ime naan nadilali kumunǝin.

¹⁴ Undun tubune me makaye yabudoko tinǝ ikagin adi kiyaneeñ yokwet wapumnen en diniyeti tinǝ ikagin indigon woon gigit yohautaune ¹⁵ metam Jesu hakuknen woon kalune me yabapnit hatiluguk agan tinahukut tinǝ nadinadinin dakaleune ikuk u kan munta tigin. ¹⁶ Me neen kakan tiginǝdi me noli mu kagin kahat tiyemgin ¹⁷ kan nadinǝ Jesudi kwet u binǝ uundok ninǝin.

¹⁸ Undun ninǝin kan muwage folon loon we tubune me yabapnit hatiluguk adi Jesu dut nonjon uundok yo ninadiguk ¹⁹ injon Jesu adi mon yonǝ indin ninguk, “Yokede woon magemag-eye Wapumdi kudi unjonin hinek tigamunǝk

wendok kahat yenimbu nadinenj.” ²⁰ Undun nim-bune me u udaneen woon Jesudi nemek timinguk u metam Dekapoli yokwetnen hatigin yenimbu nadinja boho tigin.

Tam nin muyakip yagitnit dut Jailas waabinjin'walan kahat

(Matiyu 9:18-26; Luk 8:40-56)

²¹ Jesu kotigon udaneen imengwan fokolok loon kin folon yakuk kan metam fee buna bop-negin, ²² kan Judahi'walan bopyothik dinin me wapum nin hatiluguk wou Jailas adi buna Jesu kayon folon maan hali ²³ baigon hinek indin n-nadiguk. “Waabine yagit tinja kumumbe tilak ale du kedembe buna kohoge foloon folon kameune kedebaan hatibek?”

²⁴ Undun ninguk kan Jesu adut uune metam fee nongon yehikeletaugin. ²⁵ Kan adi banamhik ginen tam nin muyakip yagit tomboyoutnit tinja hatibune gulet 12 tuguk. ²⁶ Adi haguwo-me hekidi tubukedebanim yo tagin ingon mon tikan biune folofigita undugon hatinadiluguk. Tinja undugon muneenjin maan agan yemdapmaguk. Undun tinja kedebadok dabugon ingon tububedi tinja hatiguk. ²⁷⁻²⁸ Tam u Jesu kahatnin nadiluguk doktinja buune metam feedi keletabugin, kan adi Jesu sigin folon metam banamhik ginen ungon buna indin nadiguk, “Tinahukutnin hogok wehemila kadem kedebawit.” Undun nadinja buna Jesu tinahukutnin wehemikuk, ²⁹ kan nai unaningon welen maanen adi agan kedebalat undun nadiguk. ³⁰ Undun tuguk kan Jesu adi sanininjin fofoye-tobune ungon udaneen

yali yeninguk, “Nu tinahukutne neenđi wehemilak.” ³¹ Yeninadiguk kan mihinjyedibo indin ningin, “Metam fee gehikeleen yamanon biin kan manonde yonadi undinin tilan?” ³² Undun ningin ingon Jesu adi gineen tinahukutnin neen buna wehemikuk u kawe diweguk. ³³ Diwelu tam u nemek mintaminguk u kadakaleen munta tina heheleen buna Jesu kayon folon maan hali kahatnin timinguk ³⁴ kan Jesudi indin ninguk, “Waabine, nadisukilitigedi gehitubu-kedebalak ale kulemanon woon kedem hatiluwaan.”

³⁵ Jesu adi undun yayolune me nin adi Jailas yolinekade mede tina buguk, buna Jailas indin ninguk, “Waabige agan kumulak ale hinale nimbu mu wek.”

³⁶ Undun yoguk kan Jesu adi mede wondok nadibedi mu tina indin ninguk, “Du munta mu tiben. Nadisukiliti hogok tiben.” ³⁷ Undun nina metam noli adut uundok kamehep tiyemina Pita agan Jems dut kwayan Jon hogok yanagila ugin.

³⁸ Jailas yolinej woon kalune tongiyonda wapum tina makat koyone tigin. ³⁹ U kanadina yot maanen foon metam indin yeninguk, “Togiyonda wapum i manonde tiin? Waabi i kumon mu tinak, adi damo deihtak.” ⁴⁰ Undun yobune adi kagege tigin, kan yeningkulu fakande foudapmagin kan waabi minbeu agan Jesu ne tina mihinjiye lufomkulitnin yanagila waabi u kumuna hakuknen fogin. ⁴¹ Foon kohon folon honeen ninguk, “Talita kum,” mebi adi “Waabi, nu pilalen ganilat.” ⁴²⁻⁴³ Undun nimbune pilali unjambunat tuguk kan metamdi nadiune ungonin

hinek tuguk. Kan Jesudi mu woon yobihitdok yo kamehep fafañenij hinek tuguk, tiña nanane neen mimbu nawek yeninguk. Waabi u guletñij tuwelup ginen Jesudi kudi u tuguk.

6

*Jesu menjimeniyedi kahanjinda tigin
(Matiyu 13:53-58; Luk 4:16-30)*

¹ Jesu mihinije dut kwet u biña Jesu ne yolikwelinen Nasaletde ugin. ²⁻³ Woon Sabat folon bopyotnen foon Mede Momoon yenindidimeguk kan metam adi u nadiña boho tiña indin yogin, “Me ya kamunda, en Maliya mihinij. Adi Jems, Josep, Juda, agañ Saimon heki dahik. Tiña wiwiye indegut nongon hatiyam. Ingon nadinadi indinin i dan hinek tiña buguk buña kudi ungonij tilak.” Undun yonja kahanjinda tiña nadilakata timingij. ⁴ Undun tigin kan Jesudi indin yeninguk, “Polofet adi kwetkwet kahanjinda mu tiin, ingon yolikwelinen menjimenije adi kahanjinda tiin.” ⁵ Undun ningij kan adi kudi unon mu titindok ingon fiit kohon metam lufom-kabe yagithinit folon kameune kedebagin. ⁶ Kan metam unahi adi mu nadisukilitimingij doktiña adi u yabunja welemulap tuguk.

*Jesudi mihinije 12 yeningkulu kwanai tine ugin
(Matiyu 10:5-15; Luk 9:1-6)*

Undun tiña Jesu unon yokwet hakin indigon woon Mede Momoon yeniyaunja ⁷ mihinije 12 yehibopneen lufom lufom yeningkulu kwanai titindok une tubune yabap yehikelekutdok saninin maan yemiña indin yeninguk. ⁸ “Nemek

noli mu mongo unen, kuyan̄hik hogok kedem mongotnen, en̄ lik, nanāne, muneen̄ adi mu mongo unen. ⁹ Kayon̄ namokophik kadahinen̄, dahidahi noli mu mongotnen.” ¹⁰ Undun̄ yenīna tomboyoula indin̄ yeninguk, “Uune nebek nin̄di haniutumbaan̄ hanagila yolinēn hapmeluwaaknen̄ un̄gon̄ itawoon̄ kwanai tubudapmaan̄ yokwet u bin̄a yawaneen̄. ¹¹ En̄ yokwet wapum nin̄ ginen̄ uune metam mu haniutumbaan̄ medehik mu nadin̄a tubune kan̄ yokwet u bin̄a kayohik folon̄ figifigi un̄gon̄ ulumamāneu foune yawaneen̄. Metam mebihik nadidakaledok nadin̄a mute un̄akon̄ tiyembune kayaneen̄.”

¹² Undun̄ yenimbune woon̄ metam kadakanin̄hik sigilulum tiyemdok yeniyaugin̄ ¹³ en̄ yabap maan̄ yehikeleen̄ metam yagithinit ime mundun̄ momoon̄di hafiyeyembune kedebayagin̄.

*Jon Imeyout Tububihit kumun̄nin̄ dinin̄ kahat
(Matiyu 14:1-12; Luk 9:7-9)*

¹⁴ Jesu adi kwanai tiyaune wougigitin̄ kwetk-wet nadidapmagin̄ kan̄ me mapme Helot adi maan̄ nadiguk. Metam nolidi indin̄ yoyagin̄, “Jon Imeyout Tububihitdi kotigon̄ kumun̄ ginenin̄ kaikaan̄ pilakuk doktin̄a kudi san̄jinīnit tilak.” ¹⁵ En̄ nolidi Ilaija nin̄gin̄, kan̄ noliyen̄ polofet koom hatiyagin̄ undinin̄ nin̄gin̄. ¹⁶ Kan̄ Helotdi nadin̄a indin̄ yoguk, me ya Jon Imeyout Tububihit kodi agan̄ udokogut in̄gon̄ kotigon̄ kaikaan̄ pilakuk.

¹⁷ Helot adi koom dali Filip'walaŋ tamŋiŋ lom nagikuk ¹⁸ kaŋ Jondi niŋguk, “Du tam u nagikuŋ woŋ adi yom tuguŋ.” Unduŋ hogok nilu nilu Helotdi kwihitaan mikmeniye yenimbune wooŋ Jon nagila buŋa tawa fafaŋeniŋdi ibidokoon yot fafaŋeniŋneŋ kamegiŋ. ¹⁹ Kaŋ Helot tamŋiŋ Helodiya adi welen kudup daune Jon ulukumuŋdok nadiguk iŋgoŋ Helot doktiŋa nadibedi tuguk. ²⁰ Jon adi me uŋgoŋiŋ, me momoon doktiŋa Helot adi munta tiŋa kadokoluguk. Helot adi Jon medeŋiŋ mohinek nadiluguk. Nadiŋa nadifiŋfile tuluguk iŋgoŋ fiit nadiluguk.

²¹ Ala heleniŋ Helot'walaŋ mintaminta nai foloŋ Helodiyadi Jon tubukumundok naiŋiŋ mintaguk. Ala hinaŋ wapum tiŋa gapman'walaŋ me talitimen heki, mikme'walaŋ me talitimen heki, agaŋ Galili kwet wapum diniŋ me talitimen heki nanaŋe yembune ila nalune ²² Helodiya waabiŋiŋ adi Helot hekidi kaŋ nadigalikadok yo buŋa kap miyeguk. Unduŋ tubune Helotdi niŋguk, “Nu Bepaŋ dawineŋ biyagoŋ hinek yofaŋelat, du nemek niŋdok nadiŋa nanimbune kedem gambit. ²³ Be mapme iitne fakidok nanimben kaŋ kedem gambit.”

²⁴ Unduŋ nimbune waabihem u wooŋ miŋ ninadiguk kaŋ miŋdi niŋguk, “Jon Imeyout Tububihit mebidok yoben.”

²⁵ Unduŋ nimbune waabi u kotigoŋ udaneen pi-lap hinek wooŋ me wapum niŋguk, “Jon Imeyout Tububihit'walaŋ mebi malin foloŋ kobuk yuku kameŋ tiŋa bu namuliwen!”

²⁶ Undun yobune bulaningon wapum nadiña welemulap tuguk ingon mon deti nimbek, agan Bepañ be metam namandahik folon mede yofafane tuguk doktiña fiit nadiminguk. ²⁷ Tiña mikme yenimbune yot fafañeninen woon Jon kodi udokoon ²⁸ mebi malin folon kameen tiña bu Helodiya waabinin mingin kan adibo tiña woon min mimbune kan nadihakale tuguk. ²⁹ Undun tigin kan Jon mihiniyedi nadiña woon dabaanjin u bemña woon wenefulagin.

Jesudi me 5 tausen nanaje yemguk
(Matiyu 14:13-21; Luk 9:10-17; Jon 6:1-14)

³⁰ Aposel heki udaneen buña Jesu kan nemenemek tigin be Mede Momoon yenindidimegin hogohogok u kahat timingin. ³¹ Tiña adi hakinen unon metam fee hinek Jesudi yehitubu-lodadok wonambunat tigin kan Jesu tiña mihinije adi nananehik nanandok nai nemu mintayemguk doktiña indin yeninguk, “Kwet dambek nin inde hogok woon kan hakule tinim.”

³² Undun yeniña muwage nin folon loon imengwan fokolok loon kwet fiilen ne hogok hatibe uguk, ³³ kan metam feedi yabukiyondaan adi imengwan gaga tabe hogok pilap woon Jesu tiña mihiniyedi wosuwadok kwetnen u timen woon kahile hakin. ³⁴ Kan Jesu adi muwage ginenin tatakula foon metam mohok yabuguk, kan dompa unamo kadoko mokitdi tiin undun tigin. U yabuña welebulaningon nadiyemiña Bepañ’wala Mede Momoon yenindidimeguk.

³⁵ Kwet tebeledaune mihinije woon ningin, ³⁶ “I kwet fiilen hatnene agan tebele tilak, ale metam

yeningkulune woon yokwet yamanjon hakinjen nananehik tuwanan tina itnen.”

³⁷ Undun yogin kan Jesudi yeninguk, “Hidi hide nemek nanandok neen yembu nanen.”

Undun yenimbune kotigon ningin. “Metam i hogohogok nanane yemdok u indi 2 handelet kina kutnim nadilan.”

³⁸ Undun yogin kan Jesudi indin yeninguk, “Belet debek monggo bunjit woon kanen.”

Undun yenimbune wo kan ningin, “Belet yawe kohofukun en pisi lufomuk.”

³⁹ Nimbune yeninguk, “Metam yehidaneune bop kabekabe tina kilihikit momoon folon fo ilaunen.” ⁴⁰ Undun yobu metam yehidaneune bop noli 100 noli 50 undun tina ilaugin ⁴¹ kan

Jesudi belet yawe kohofukun en pisi lufomuk u mongola dadiyeen kunum folon diween Bepan niutumbaan metam daneyemdok yonja belet wobunja mihinije yembune daneen yemtaugin. Agan pisi maan undugon wobunja daneyemguk.

⁴² Kan metam hogohogok naan tuwot tubune

⁴³ mihinijedi nadikidiki u bondibondi 12 kadahitokogin. ⁴⁴ Me’walan hogok kunakunathik 5 tausen.

Jesudi imengwan folon uguk
(Matiyu 14:22-27; Jon 6:16-21)

⁴⁵ Undun tina nai unaningon Jesudi mihinije yeningkulune nehi hogok muwage folon loon Besaidade timen ugin. ⁴⁶ Kan ne metam

yeningkulune udapmaune ne hogok tuwai folon loon Bepan ninadi hatuguk. ⁴⁷ Ala bufalune Jesu adi ne hogok hatu mihinije adi agan muwage

folonj ime lekingonj uginj. ⁴⁸ Ulune fifingobutdi adi uginjenkade fedila buŋa yehisiloneune mihiniye uundok kwanaiminj titauginj. Undunj tiŋa ila ulune helehelede Jesu adi ime tabe foloningonj yalitabuguk. Buŋa yabuŋa yalakapmewe tuguk ⁴⁹ kaŋ mihiniye adi kaŋ momolok kainj yonŋa munta tiŋa yakawe totiginj. ⁵⁰ Kaŋ yeninguk, “Fafane tiŋa itnenj. Nagonj bulat ale munta mu tinenj.” ⁵¹ Undunj yeniŋa muwage folonj loune sub-uba wapum buguk wabiune mihiniye adi boho tiŋa nadiu ungoninj hinek tuguk. ⁵² Koom metam 5 tausen nanane yemguk u kaŋ sanjiniŋŋinj unŋaninj mu kadakaleginj ingonj kobuk kaŋ naditomginj.

Jesudi Genesalet unonj tubukedeba-kedeba kwanai tuguk

(Matiyu 14:34-36)

⁵³ Ime fokolok loonj muwage u tiŋa woonj Genesalet imenŋwanj maginenj tehiŋa uginj, ⁵⁴ kaŋ metam adi Jesu pilap hinek kakiyondan ⁵⁵ yokwet indigonj tuwot kiyane yaunŋa metam yagithinit falik folonj yapmeenj kwiloonj kwet unonj be unonj hatuguknenj unonj yanagi usuwayaginj. ⁵⁶ Jesudi yokwet ginenj be yot wapumnenj be dambedambek uluguk hogok metam fofohidi yagithinit yanagila wawaliwenj buŋa dahidahinj diki honeenj kedebadok ninadiginj. Kaŋ metam nediyen dahidahinj diki honeginj adi kedeba-utumba tiginj.

7

Jesudi titinhik komidok mede yeninguk
(Matiyu 15:1-9)

1-5 Falisi heki en Yodoko Mede hinale Jelusalemhi bugin adi kiula buŋa Jesu kagin. Tiŋa ila mihinjiyedi nanane nagin yabuŋa indin ninjin, “Dedin doktiŋa mihigeye adi wapuhiniye’walaŋ titinhik dinin yodoko u lahula nanane nanaŋdok kohohik mu youtela hogok naiŋ.” Juda me heki adi mamahi-papahiyedi koom tagin unakon kelen tagin doktiŋa undun ninjin. Nanane nanene kohohik adi koom youtekagin undun youtela nayagin, be nanane me nolidi yetiŋa mongo buune tuwayagin adi hogok mu hinayagin, timen youtet tiŋa hinayagin, be kabot, maliŋ, ime gitnaŋdok tout, mutehik adi youtetdok tali kamegin undugon hinek keleen youtela mongo hatiyagin.

⁶ Undun doktiŋa ninadigin kaŋ indin yeninguk, “Koom polofet Aisaiyadi yalaŋ-me hiditok-ku mede biyagon hinek indin yoguk. ‘Mebop yen adi mahikdi hogok naniutumbaŋ welehikdi mu nabukahilein. ⁷ Bepaŋ’walaŋ mede yonŋa kwet-folon me’walaŋ mede kelenila nu naniutumbain wondi foloonnit mokit tilak.’ ⁸ Bepaŋ’walaŋ mede agaŋ bikabuŋa kwetfolon me’walaŋ mede hogok tagimneen hatiŋ hidi.”

⁹ Undun yeniŋa kotigon tomboyoula indin yeninguk. “Hidi Bepaŋ’walaŋ mede bikabuŋa hide’walaŋ nadinadihik hogok keleen indin tiin. ¹⁰ Mosesdi ‘Du maange baha’walaŋ mede tilolon titindok’ yoguk, en ‘Nebek nin di mimbeu mede-haki yenimbune kaŋ ulukumun titindok’ yoguk. ¹¹ Ingon hidi indin yoin. ‘Nebek nin di min be beu indin nimbetik: Nemek du gamuŋa gehiuli-

hidok u aganj Bepanjok silonj timilat, ¹² adi undun kedem yonja mimbeu mu yehitubu-lodalawaak.
¹³ Hidi undun tinja Bepanj'walañ mede yotubufit tiinj. Enj Bepanj'walañ mede fee undugon ulamonogofoinj.”

Nemek fakanñinđi me welehiik mu tubukadalak
(Matiyu 15:10-20)

¹⁴ Undun yeninja metam kotigon kutiyenimbu bunja bopneune yeninguk, “Mede i hanimbene nadinja nadidakale hinek tinenj. ¹⁵⁻¹⁶ Nemek fakanñinđi meenenj maanenj folak wendi kadakaninj mu tilak, monj hinek. Me maanenj hali fakanj labulak wondi biyagonj kadakaninj tilak.”*

¹⁷ Undun yeninja yot maanenj foune mihinijedi mede u mebi yodakaleune nadidok yo ninjinj
¹⁸ kanj yeninguk, “Hidi adi me noli dabugonj, nadinadiahinit mokit. Mede deti mu nadidakaleinj? Nemek fakanñinđi me maanenj foonj ¹⁹ welenj mu tubukadalak. Adi kaba ginenj ila foonj dapmaan kumobom ginenj folak doktinja wondi kadakaninj mu tilak.” Undun yenindakaleenj yoguk, “Nanane hogohogok adi nananjok hogohogok.”

²⁰ Tinja tomboyoula indinj yoguk, “Nemek me welehiik maanenj hali labulak wendi kadakaninj tilak. ²¹ Kanj welehiik maanenj kadakaninj indihidi labiinj: Nadisu kadakahi, keffile titinj, kubo titinj, mehinek widihikumunj titinj, ²² nehi wapumgonj

* **7:15-16:** Nadinadi me nolidi indinj yoinj. Mede diki indinj, “Nebek ninj adi nadidakalewe kanj magi baigonj kametnadinja nadiwek.”

mongotdok titiņ. Eņ nemek kadakahi noli, me niņ bombon ɸofohi tinahukulune me nolidi nu tibit dabuņ adi tilak yo kakwihita tiņ, be sigitiņalo tiņ, be me yeniwoliwolike tiņ, be me yalan yeniņ. ²³ Nadinadi undihidi me maanen labuņa mehinek yehitubu-kadakalak.”

*Tam niņdi Jesu nimbulabulaye tuguk
(Matiyu 15:21-28)*

²⁴ Unduņ yeniņa Jesu Taiya yokwet wapumnen uguk. Woon kabup hebihale yot maanen foguk iņņon dedin tiņa kabup hale tuguk. Metam nadidapman timiyagin ²⁵ doktiņa tam niņ waabiņiņ yabapnit adi pilap hinek buņa Jesu kayon folon maan hali nimbulabulaye tuguk. ²⁶ Tam u Gilikniņ, ala yolikweli Fonisiya. Adi waabiņiņ Jesudi yabap kelemimbek yo buņa niņguk. ²⁷ Kaņ Jesudi indin niņguk, “Wapmihi’walaņ nanane yolom monbola kamo yemtoine tuwot mu tibek, doktiņa timen adi wapmihi nehi naan tuwot tubune.”

²⁸ Unduņ yobune mede toboniņ indin tubu-udanemiņguk, “Wapum, unduņ iņņon oņ, kamo heki adi wapmihi’walaņ nanane munamunam bahiņ ginen maune uņņon naiņ.”

²⁹ Unduņ yobune Jesudi indin niņguk, “Medege unduņ tubu-udanelan doktiņa kedem yokede woon waabige kedebaan hatak kawer.” ³⁰ Unduņ niņa niņkulune woon waabiņiņ agan kedebaan halune wo kaguk.

Jesudi me kauleņ tubukedebaguk

³¹ Unduņ tiņa kwet u bikabuņa Saidon kwet-nen yokwet wapuhi 10 yalakapmeen woon Galili

Imengwanneŋ wosuwaguk. ³² Unŋon wosuwaguk kaŋ metamdi me niŋ magi kaulen mede mu yoluguk nagila buŋa Jesudi kohon me foloon folon kameune kedebawek yo niŋniŋ. ³³ Kaŋ mehinek fee hakiŋ doktiŋa Jesu adi me u nagila nehi hogok woon kohon yalaki sumulune me magi ginanen foguk, kaŋ maluluk ne kohon folon suwambali me kaulen mebelemniŋ wehemikuk, ³⁴ tiŋa kunum folon diweu loune munabut tiŋa indiŋ yoguk, “Efata.” (Indi’walaŋ mede folon adi “tombek”).

³⁵ Unduŋ yobune me u magi tombune mede kedem nadiguk, eŋ mebelem maan lodaune mede kedem yoguk. ³⁶ Unduŋ tiŋa metam mu yobi-hitnen yeninguk, iŋon adi gicine tiŋa gibita yoyaugiŋ. ³⁷ Yobune metamdi mede u nadiŋa nadiune beweniŋon hinek tubune indiŋ niŋniŋ, “Nemenemek momoon hinek tiŋa me mede mu nadiiŋ be yoiŋ yehitubu-kedebaune mede yoiŋ eŋ nadiiŋ.”

8

Jesudi metam 4 tausen nanaŋe yemguk (Matiyu 15:32-39)

¹ Nai mu kweheyelune unaniŋon metam bop wapumdi kotigon buŋa bopnegiŋ. Iŋon nanaŋehik mon, doktiŋa Jesudi mihiniye yehibopneen yeninguk, ² “Metam i nukut buŋa hatibune helebufa lufomkulitniŋ tilak, kaŋ nanaŋehik agan dapmaune map tubu yabuŋa bulanŋon nadiyemilat. ³ Metam noli kweetniŋ hinek bugiŋ doktiŋa map tiŋa agan gweheye tiŋ

i yeningkulene unen woon noli talipmen dauhik kulune maneenen.”

⁴ Undun yeninguk kan mihinjyedibo indin yogin, “Kwet fiilen indinen nanane dengon yehitubu-mintaan metam bop wapum i yemne natoki tinen?”

⁵ Undun yogin kan Jesudibo yeninadiguk, “Kan hide’wala belet dedigon boihakiin?”

Yobune adibo yogin, “7 hogok.”

⁶ Undun nadiña metam yenimbune kwetfolon foon ila ugin. Kan belet 7 u monggo Bepan niutumbaan wobuna mihinjiye yembune adibo metamdok yemtaugin. ⁷ Undun tiña pisi kuyahi lufom-kabe u mongola Bepan niutumbaan mihinjiye yembune u maan mongola metam dane-yembune nagin. ⁸⁻⁹ Metam 4 tausen-di nanane u naan tuwot tigin kan nanane nadikidiki tigin u Jesu mihinjyedi mongola bondibondi 7 kadahitokogin. Undun tiña metam yeningkulu uune ¹⁰ Jesu adi mihinjyedut muwage ginen loon Dal-imanuta kwetnen ugin.

*Falisi hekidi Jesu kudi titindok ningin
(Matiyu 16:1-4)*

¹¹ Woon hatune Falisi heki adi Jesu hakuknen buna deti honeen nagitnim yona siweneen indin ningin, “Du Bepan’walaanin biyagon hinek nobu fowen kan kudi nin tubune sanjininge kanim.”

¹² Undun ningin kan Jesu adi munabut wapum tiña yeninguk, “Metam kobuhi hidi mangonde kudi tibe kakan dok naniin? Nu biyagon hinek hanilat, nu kunum ginenin kudi tift tibit kan hidi mu nadisukilitinen doktiña mu tibit.” ¹³ Undun

yeniņa mihiniyedut muwage folon loon ime fokolok login.

Jesudi Falisi heki ginen yo mihiniye yeniņkiliti tuguk

(Matiyu 16:5-12)

¹⁴ Mihiniye adi belet mongotdok kaule tiņa kubugon hogok tiņa ugin ¹⁵ kan Jesudi fafaņenjon hinek indin yeniņguk, “Hidi Falisi en Helot heki’walaņ belet tububedidok haguwo ginen ala nadinadiņale hatiyaneen.”*

¹⁶ Undun yenimbu nehi unjon kiyonadi tiņa indin yogin, “Indi belet nemu monjo bumun doktiņa undun ninilak.”

¹⁷ Kan Jesudi manjon dok yonadigin u agan nadiņa yeniņguk, “Hidi manjon de belet kauleen biyabuņa bunjit wendok yonadiin? Mede mu nadiinbe, be mu nadidakalein? Hidi nadinadinit mokit be? ¹⁸ Dauhi sipmakahi be? Be magihik kaulehi, mu naditomiin be? ¹⁹ Koom metam 5 tausendok belet kohofukun wobugut kan naan tuwot tubune nadikidiki bondibondi dedin kadahitokogin?”

Yeninadiune “12” niņgin.

²⁰ “Kan belet yawe 7 wobuņa metam 4 tausen yembe naan tuwot tigin kan nanaņe nadikidiki bondibondi dedin kadahitokogin?”

Yeninadiune “7” niņgin.

* **8:15:** Mede u mebi indin: Falisi en Helot heki’walaņ titiņhik adi belet tububedidok haguwo undinin. Undun doktiņa hidi adi’walaņ titiņhik faki-kabe niņ tineen adi u-kabe wondigon titiņhik foon u kedem tubukadakawaak.

²¹ Kan yeninguk, “U aganj kagin ingon deti mu nadidakalein?”

Jesudi me dausipmik nin tubukedebaguk

²² Jesu adi mihiniye dut woon Besaida usuwaune metam nolidi me nin dawi sipmakan nagi bunja Jesudi tubutombek yo ningin. ²³ Kan Jesudi me u kohon folon honeen hamaneen nagila nehi hogok yokwet magingen woon maluluk dawi folon suwambali kohon dawi folon kameen ninadiguk, “Nemek kedembe yabulan?”

²⁴ Undun nimbune me u diween yoguk, “Een, metam yabulat ingon yabe bem dabugon yawiin.” ²⁵ Undun yoguk kan Jesudi kotigon kohon me u dawi folon kameguk kan diwedakaleen nemenemek kadem yabuguk. ²⁶ Kan woon yokwet maanen mu fowek niheja ninkulune yolide uguk.

Pitadi Jesu'walan mebi yodakaleguk

(Matiyu 16:13-20; Luk 9:18-21)

²⁷ Jesu adi mihiniye dut Galili bikabunja Sisaliya Filipaide ugin. Talipmen woon mihiniye indin yeninadiguk, “Metamdi nutok dedin hinek naniin?”

²⁸ Kan adibo ningin, “Nolidi Jon Imeyout Tubu-bihit yoin en nolidi Ilaija yoin, en nolidi Jelemaiya yoin, kan nolidi polofet nin undun yoin.”

²⁹ Undun yobune nehibo yeninadiguk, “Kan hidi hide nutok dedin naniin?”

Undun yeninadiune Pitadi ninguk, “Du adi Kilisto.”

³⁰ Undun nimbu yeninguk, “Nebek noli mu yenimbihitneen. Mon hinek hanilat.”

*Jesudi kumunjin dok yoguk
(Matiyu 16:21-28; Luk 9:22-27)*

³¹ Undun yeninga kumunjin dok indin tubu-bihila yeninguk, “Silonyot dinin talitimen wapum heki en Yodoko Mede hinale heki tina Judahi’wala me wapuhi noli adi Me Kobumun medenin mu nadinga folofigita wapum mina ulukumuneen, ingon helebufa lufomkulitnin dapmaune kotigon kumun ginenin kaikaan pilalaak.”

³² Mede u yenindakaleune nadinga Pitadi Jesu ne hogok nagila woon “Mede undinin u mu yodok” yo kwihikwihilen gon nihep tuguk.

³³ Kan Jesu adi udaneen mihiniye yabuna Pitadi mede yoguk u nadiune tuwot mu tubune ninguk, “Sadan, du tabawen! Du mede yolan won adi Bepan’wala mede mon. Won adi kwetfolon me’wala hogok.”

³⁴ Undun yona mihiniye en metam yenimbu buna bopneune yeninguk, “Nebek nin di nu nehikelewe nadinga ne’wala welen dinin be sigin dinin nadinadi wabidapmaan helemahelman kolondabeknin bemna nu nehikeleluwaak.

³⁵ Kobuk nebek nin di hatihatinin netok kahilewaak adi fiit timimbaak. Be nebek nin di nutok be Mede Momoondok tina hatihatinin bikabaak adi hatihati foloon kahilewaak. ³⁶ Nebek nin adi kwetfolon nemek fila liwe tibaak wendok nadigalikaan gigne hinek tihatilune hatihatinin fiilune undiningon hinek kotigon denanin kan tibaak? ³⁷ Be welen filaak wendok kibikon mangon kame hatibune tuwot hinek tibaak? Me

nin kwetfolon dinin bombondok nadigalika tin̄a welen kuyanindok mu nadin̄a, be Bepan̄ sigilulum timimbaak adi hatihati foloon hinek deti kahilewaak? Mon̄ hinehinek. ³⁸ En̄ nebek nin kobuk nai kadakanin̄ yendok, na be medene sigilulum tinimiṇa kwetfolondok nadinadi hogok tibaak adi nubo udaneen̄ anelo ungonin̄ hekidut Bepan̄'walaṇ saṇiniṇin̄ folon̄ buneemnen̄ me be tam u kibimaan̄ sigilulum timimbaat."

9

Jesu namanda ungonin̄ tuguk (Matiyu 17:1-13; Luk 9:28-36)

¹ Undun̄ yeniṇa tomboyoula indin̄ yeninguk, "Biyagon̄ hinek hanilat. Metam i ikiin̄ noli adi kumun̄ mu tin̄a hogok hatilune Bepan̄'walaṇ Hatihati Kobuli saṇiniṇnit mintadakaleune kaneen̄."

² Jesu adi melenai 6 hatiṇa Pita, Jems agan̄ Jon yanagila kweboboe kweheyenin̄ nin̄ folon̄ loon̄ nehi hogok hakin̄. Hali kalune Jesu namanda ungonin̄ tubune ³ tinahukutṇin̄ adi fafau niyaniyan̄ hinek mintadapmagin̄. Nebek nin̄ kwetfolon̄ inon̄ nemek nin̄ youtelu undinin̄ mintawekdok tuwot mon̄.

⁴ Undun̄ mintaune yakalune Moses dut Ilaija adi mintaan̄ Jesu dut mede yonadi ya tigin̄. ⁵ Kan̄ Pitadi Jesu indin̄ ninguk, "Hinale, kedem hinek indi maan̄ ingon̄ hakam, ale yoholan̄ lufomkulitnin̄ manim, noli dutok, noli Mosesdok agan̄ noli Ilaijadok." ⁶ Pita adi yabuṇa munta tin̄a mede mu nadidakaleen̄ hogok yofit tuguk.

⁷ Undun tija yatune mulukwanji buja yehitu-mulune yali nadilune mulukwan ginen mede nin indin mintaune nadigin, “Yadi na’wala Mihine hinek, welenedi kahilelat. Ale hidi adi’wala medenin nadimiyaneen.” ⁸ Undun yobu udaneen nebek noli unon nemu kagin, Jesu ne hogok yalune kagin.

⁹ Undun tija kweboboe bikabuja fonila fonila Jesudi indin yenihenja yeninguk, “Hidi nemek ungonin hinek kanji i nebek nemu nimbihila hat-ibune Me Kobumun adi kumun ginenin kotigon kaikaan pilalaak.”

¹⁰ Undun yenimbu medenin tagimneen nehi hogok ungon yonadija yogin, “Kumun ginenin pilalaak u mebi dedin hinek?” ¹¹ Undun yonja Jesu ninadigin, “Mangonde Yodoko Mede hinale hekidi Ilaija adi timen baak yoin?”

¹² Yonadiune yeninguk, “Ilaija adi biyagon timen buja nemenemek tiulidokowaak. Ingon Yodoko Mededi indin maan yolak, Me Kobu-mun adi medenin mu nadija, folofigita kisan hinek mineen. ¹³ Ingon indin hanimbe nadinen. Ilaija adi agan buguk ingon Yodoko Mededi yolak undun, metamdi nemek nehi nadinadi hogok takalija kaka timingin.”

Jesu mihinijedi yabap kelekutdok kwanaimin tigin

(Matiyu 17:14-21; Luk 9:37-43)

¹⁴ Jesu tija mihinije adi fosuwaan bulune metam feedi buja bopneen yali yabulune Yodoko Mede hinale heki adi Jesu mihinije noli dut siwe

yatigin. ¹⁵ Siwe tulune Jesu tiŋa mihinje fosuwaune metam Jesu kaŋ sukuleen kiyane woon kagin. ¹⁶ Kaŋ Jesudi mihinje yeninguk, “Hidi adut siwe maŋgonde tiin?”

¹⁷ Unduŋ yeninadiguk kaŋ me ninŋi ninguk, “Hinale, nu mihine yabapnit mede mu yolak doktiŋa nagi bulat. ¹⁸ Yabap fomilaknen nai unanin kwetfolon maŋ, maŋin faik tiŋa, maŋin sikilitiŋa, foloon kohondakut tilak. Unduŋ doktiŋa mihigeyedi yabap kelelutnen yeninŋat kaŋ ninkelekulinŋit inŋon mu labu bu-unak.”

¹⁹ Unduŋ yobune Jesudi indin yenintoguk, “Hidige, detiŋa nadisukilitihik kuyanin kabe! Nai dedigon hidut hatiŋa hanimbe nadisukilitineen? Mihi u nagila inŋon but!”

²⁰ Yenimbu mihi u nagi woon Jesu mingin. Nagi wo mimbune yabapdi Jesu kaŋ mihi u tukulune maan kwetfolon hali kumunŋweheye tiŋa maŋin faik tiŋa tuguk,

²¹ Kaŋ Jesudi beu ninadiguk, “Nai denin hinek i tububihila tuguk?”

Ninadiguk kaŋ beudi yoguk, “Koom kuyaninen tugukdi titabulak. ²² Yabapdi nai fee hinek nagila tubukumunbe ime ginen be kudup ginen kulabulak. Du saŋininge tuwot hakamulak nadikan fiit inditok bulaninŋon nadiŋa nihitubu-lodawen.”

²³ Unduŋ ninguk kaŋ Jesudi ninguk, “Maŋgonde saŋininŋedok naninadilaŋ? Me nadisukilitihini adi nemenemek nehi kedem tineŋ.”

²⁴ Nimbune yoguk, “Nadisukiliti tilat inŋon wapum mon doktiŋa nehitubu-lodaune wapumgon bediwek.”

²⁵ Undun yayolu metam bunja yehitumut tigin, doktina Jesudi yabap hogoli indin ninguk, “Yabap kaulen, mede mu yolan, du mihi i welen maanenjin labunja woon kotigon mu bu fomimbaan. Mon hinek ganilat.”

²⁶ Undun nimbu yabap adi yakawe tonja mihi u tukulune maan kumungweheye tina halune labu bu uguk. Kan mihi u kwetfolon maan daban wele hakuk, kan metam adi agan kumunja hatak yogin.

²⁷ Ingon Jesudi kohon folon honeen tubupilalu kolon yakuk.

²⁸ Undun tina Jesu adi yot maanen foguk, foon nehi hogok hali mihinijedi indin ninadigin, “Indi dedin doktina yabap hogoli u ninkelekutdok kwanaimin tumun?”

²⁹ Ningin kan Jesudibo yeninguk, “Yabap undihi yehikelekutdok talik noli nemon. Talik kubugon adi indin: [Nanaje kameheja]* ninadi kwanai tina kedem yehikelekutdok.”

*Jesu kumunjin dok kotigon yeninguk
(Matiyu 17:22-23; Luk 9:43-45)*

³⁰ Jesu mihinije dut kwet u bikabunja woon Galili kwet lekingonnen unon ugin. Unon woon hatibune nebek nindi unon hatak u mu nadinen yonja tuguk. ³¹ Undun tina nehi hogok hatinila mihinije yeniyehitubu-didime kwanai tina indin yeniluguk. “Me Kobumun adi kwetfolon me’walan kohohik folon kameune ulukumuneen kan helebufa lufomkulitnin dapmaune kotigon pilalaak.”

* **9:29:** Nanaje kamehep dinin mede u Gilik pepa noli ginen mu youkin doktina gimbahan ginen youkumun.

³² Adi undun yenimbune mede wendinin mebi mu nadidakalegin doktina mede wendok nina-dinin yo nadigin ingon munta tina wabigin.

*Talitimen titindok mede
(Matiyu 18:1-5; Luk 9:46-48)*

³³ Kafanaum wosuwaan yot maanen foon Jesudi mihiniye indin yeninadiguk, “Talipmen buna mangondok yonadinjit?” ³⁴ Undun yeninadiguk kan mihiniye adi talipmen bunila neendi lekingonhik ginen lolonit hinek tilak yona yonaditabugin doktina meka tina kabup ikin. ³⁵ Kan Jesu adi kwetfolon foilana yenimbu buna bopneen ilune yeninguk, “Nebek nin di talitimen tibe nadin netok nadiune fofonit tubune me noli tipilapilaye tiyemuluwaak.”

³⁶ Undun yeninga wapmihi-kabe nin nagila lekingonhik folon kameu yalune tobona yeninguk, ³⁷ “Nebek nin di nutok tina wapmihi indinin momoon timiluwaak adi nu maan momoon tinamuluwaak, en nebek nin di nu momoon tinamuluwaak adi nu hogok mu tinamuluwaak, me napmeune fogut adi maan timiluwaak.”

*Nebek nin mik mu tinimilak adi yadi indi'walan
notnik
(Matiyu 10:42; Luk 9:49-50)*

³⁸ Jondi Jesu indin ninguk, “Hinale, indi me nin du wohoge ginen yona yabap yehikeleune kamun, ingon adi indut tomboyoula du wanan mu gehekeleyaulak doktina mon nihemun.”

³⁹ Undun yobune Jesudibo indin ninguk, “Mon, u nihep mu titindok. Nebek nin di nu

wotnene yonja kudi tibaak adi naniṅkadaka mu tibaak. ⁴⁰ Nebek niṅ mik mu tinimilak adi yadi indi'walaṅ notnik. ⁴¹ Biyagon hinek hanilat. Nebek niṅ nu'walaḥi hiditok 'Wapum'walaṅ kwanai-metam' yonja ime-kabe hogok gihambaak silon undiniṅ wonḡadi tuwanjit mokit mu halaak."

*Kadakanin mu titindok dinin mede
(Matiyu 18:6-9; Luk 17:1-2)*

⁴² "Nebek niṅdi wapmihi kuyahi-kabe nadisukilitinamiin u yehitubu-gweheyeune kadakanin tineen adi me u kawade bigim malabumunḡi kodi folon tehikapmaan imenḡwan ginen tapmetukulune foon kumun tubune tuwot tibek. ⁴³⁻⁴⁴ Undun doktiṅa kohogedi kadakanin tubune kaṅ kohoge u udokokut tiluwaan. Undun tiṅa Hatihati Kobuli ginen kohoge fukunḡon hogok kedem waan. En undun mu tiṅa kohoge lufomnikon hatibaan adi kwet kadakanin kudup kumunḡkumunḡnit mokit ha-dalaknen unḡon fowaan.† ⁴⁵⁻⁴⁶ Be kayogedi kadakanin tubune kaṅ kayoge u udokokut tiluwaan. Undun tiṅa Hatihati Kobuli ginen kayoge fukunḡon hogok kedem waan. En kayoge lufomnikon hatibaan adi kwet kadakanin ginen foon kudupdok gigit tibaan. ⁴⁷ Be daugedi kadakanin ginen ganagilune kaṅ kubugonṅin kidila tukukut tiluwaan. Undun

† **9:43-44:** een 9:46 Nadinadi me nolidi mede diki nimaan yowo yendok mu tomboyoula youkin kaṅ hatak nadiin adi indin. "Unḡon foune binemdi hehisineen u kumun mu tineen be kudup fafanen hehidawaak u kumun mu tineen." Yowo 48 ginen kedem kawen.

tiŋa Bepaŋ'walaŋ Hatihati Uŋgoniŋ kedem wo kawaan. En dauge lufomnikoŋ hatibaan adi kwet kadakanin ginen foon kudupdok gigit tibaan. ⁴⁸ Uŋon founne binem hehisineen u kumun mu tineen, be kudup fafaŋen hehidawaak u kumun mu tibaak. ⁴⁹ Me hogohogok kudupdi felen wele mintayembaak. ⁵⁰ Felen adi koban inŋon kobanin dapmaune kotigon koba mu tilak. Wendok tuwot hidi maan felen koban dabugon mintaan menot momoon tiŋa kulemanŋon hatiyaneen."

10

Kikabi diniŋ mede

(Matiyu 19:1-12; Luk 16:18)

¹ Undun tiŋa Jesu adi kwet u biŋa Jodaŋ ime meŋeŋa Judiya kwetneŋ loguk. Loune metam fee mumuyenŋon bugin kaŋ feŋ tuluguk undun Mede Momoon yeninguk. ² Kaŋ Falisi noli adi buŋa detiŋa honeen uutdok yo indiŋ ninadigin, "Yodoko Medenikdi tam kedembe kelekutdok yolak be dedin? U ninimbu nadinim."

³ Undun ninadigin kaŋ Jesudibo yeninadiguk, "Mosesdi Yodoko Mede dedin haninguk?"

⁴ Yeninguk kaŋ yogin, "Moses adi tam bibindok yofafane mede pepa folon youlaŋa tam kedem bikabudok nininguk."

⁵ Undun ningin kaŋ yeninguk, "Hidi wele-hik fafaŋehi tiŋa mede nadinadi mu tiin dok-tiŋa Mosesdi Yodoko Mede u youkuk. ⁶ Bepaŋ adi nemenemek yehitubu-mintanila me tiŋa tam wanaŋ yehitubu-mintaguk. ⁷ Undun doktiŋa me nin adi mimbeu biyabuŋa tamnin'walaŋkade

woon galinga adi welehek be sigihikdi kubugon mintaan hatidemeek. ⁸ Undun doktina adi molomolom mu tamuk. Adi aganj kubugon mintaan hatiyamuk. ⁹ Bepandi yehikiukuk doktina meenindi tuwot mu yehidanedok.”

¹⁰ Undun yeninga yopman woon mihinijedibo mede wondok ninadigin ¹¹ kan yeninguk, “Me nin adi tamnin kelekula tam gitipmun nagilaak adi yofolokhik fafanej u ulopmadiwaak doktina kefile dinin malabumun hekiwaak. ¹² Kan tamdi yohoi kelekula me gitipmun nagilaak adi maan undugon kefile dinin malabumun hekiwaak.”

Jesudi wapmihi kahan tiyemguk
(Matiyu 19:13-15; Luk 18:15-17)

¹³ Metam noli adi wapmihihiye Jesudi kohon kihik folon kamewek yona yanagila bugin, kan Jesu mihinije adi yehihet tigin. ¹⁴ Undun tigin kan Jesudi u kaune tuwot mu tubune mihinije indin yeninguk, “Wapmihi biyabune nu’walaakade bunen. Kamehep mu tiyeminej. Bepan’wala heben folon Hatihati Ungonin hatak u yadi wapmihi undihidegon. ¹⁵ Biyagon hinek hanilat. Nebek nin adi wapmihi-kabe dabugon tina Bepan’wala Hatihati Ungonin mu kahilewaak adi yadi unon mu fowaak.” ¹⁶ Undun yona yehibopneen noli yehitobo tina kohon mebihik folon kameen kahan tiyemguk.

Me bombonit nindi Jesu kelewe yoguk
(Matiyu 19:16-30; Luk 18:18-30)

¹⁷ Jesu kotigon we tubune me nindi kiyane labuna mulelem timina indin ninadiguk “Hinale

momoon, nu mangon tinja hatihati dapmandapmanjit mokit kahilewaat?”

¹⁸ Undun ninadiune Jesudibo indin ninguk, “Mangonde nu momoon nanilan? Nebek nindi momoon nemu hatilak, Bepandi hogok hatilak.

¹⁹ Yodoko Mede i agan nadilan. Du me widi-hikumun mu tuluwaan, hekimalam hidi keffile mu taneen, du kubo mu tuluwaan, du menolidok yalan mu yeniluwaan, du maange baha’walan mede tilolon tuluwaan.”

²⁰ Undun yobune me wendibo ninguk, “Hinale, nu koom kuyaninengon Yodoko Mede u hogohogok agan tagimneen tugutdi titabulat.”

²¹ Undun nimbune Jesudi kan aditok nadiminja ninguk, “Nemek kubugon nimaan titindok hatak won adi indin. Bombonge hogohogok tuwadok boiune tuwaune muneen u metam fiyewakahidok yemben. Undun tiben kan nemenemek momohi kunum ginen ungon boigambu itneen. Ale undun tinja bunja nu nehikelewen.” ²² Undun nimbune me u muneen bombon wapum hinek halimingung doktina mede u nadina welemulap tinja uguk.

²³ Me u uune Jesudi udaneen mihiniye indin yeninguk “Me muneen bombonhinitdi Bepan’walan heben ginen Hatihati Ungonin u kahiledok kwanaimin tiin.” ²⁴ Mihiniye adi u nadina boho tigin, kan tomboyoula indin yeninguk, “Wapmihineye, Bepan’walan Hatihati Ungonin kahiledok adi kwanaiminjit. ²⁵ Kale kamel* adi bunji ginanen fofondok kwanaimin

* **10:25:** Kamel adi kale wapum, makau dabugon.

tuwot mu tibek, ingon me muneen bombonhinit adi Hatihati Ungon kahiledok kwanaimin wapumgon hinek tineen.”

²⁶ Mihiniye adi mede u nadija boho kisan tija nendi kedom kahilewaak yona nehi ungon kiyonadi tigin. ²⁷ Kan Jesudi yabuhohone tija yeninguk, “U meeni di titindok tuwot mon, ingon Bepan’walankade adi nemek u be u titindok adi kwanaimin mu tilak.”

²⁸ Undun yeningguk kan Pitadibo indin yoguk, “I kawen, indi nemenemek hogohogok biyabudapmaan du gehikeleyam.”

²⁹ Undun nimbune yeninguk, “Biyagon hinek hanimbit. Nebek nin adi nutok be Mede Momoon doktija yoli, be dali-kwayaniye, be minbeu, be wapmihi-tam, be dininani biyabuna baak ³⁰ adi yot, be dali-kwayan, be wiwiye, be minbeu, be wapmihi-tam, be dininani dok banin mu tuluwaak. Bepandi fee hinek miluwaak. En Mede Momoon doktija kwadi kaneen adi kougong hatihati dapmandapmanit mokit kahileneen. ³¹ Ingon nai indinde lolonhinit hatiin feedi kougong fofonhinit hatineen. Kan fofonhinit hatiin feedi kougong lolonhinit hatineen.”

Jesu kumunindok yenimbu nai lufomkulitnin tuguk

(Matiyu 20:17-19; Luk 18:31-34)

³² Jesu adi mihiniye dut Jelusalemde lone login. Ne timen uune mihiniye adi boho tija mindan keletalogin. Kan metam adi munta tija mindan yehikelegin. Kan Jesudi kotigon mihiniye

nehi hogok yanagi woon nemek mintawaak wondok indin yeninguk. ³³ “Nadiin be, ya agan Jelusalemde loyam. Unon Me Kobumun bolik timimbune me Silonyot dinin talitimen tinu Yodoko Mede hinale heki’wala kohohik folon lowaak. Loune kumundok nindapmaan Loma me heki’wala kohohik folon kameneen, ³⁴ kan nimpekit tinu maluluk suwambali kiyegelepdi utubukadakaan ulukumuneen. Kan helebufa lufomkulitnin hali kotigon kaikaan pilalaak.”

*Jems dut Jondi me lolonhinit titindok yogumuk
(Matiyu 20:20-28)*

³⁵ Undun yeninguk kan Sebedi mihinijat, Jems dut Jon adi woon indin ningumuk, “Hinale, indi nemek nin tinimdok nadiyamut.”

³⁶ Undun ningumuk kan Jesudibo yeninadiguk, “Mangon tihamdok nadinu yonadiyamuk.”

³⁷ Kan yogumuk, “Hatihati kobuli hauta wapumnit ginen loon popge ungonin folon ila indi ninigila noli kohoge didimeninjenkade en noli kohoge kapmadinenkade nipmeune itemeet.”

³⁸ Undun ningumuk kan Jesudibo yeninguk, “Hidi nemek u mebi mu nadidakaleen hogok yofit tamuk. Hidi nu ime buukaan nawaat u kedembe nademeek? Tinu Imeyout tinamneen u hidi maan kedembe youhamneen?”

³⁹ Kan adibo yogumuk, “Een, indi kedem tide-meet.”

Undun yobu Jesudi yeninguk, “Biyagon hinek, nu ime buukaan nawaatnen u hidi kedem nademeek, tinu Imeyout tinamneen u hidi maan youhamneen, ⁴⁰ ingon hidi’walaanin nediyeen

nu kohone didimeniñnenkade en kohone kap-madinenkade iitdok u nu tuwot mu hanindap-mawit. Wonj adi Bepañ ne meeniñ yabukahileen gigit uyemguk adi hogok kahileneen.”

⁴¹ Kañ mihiniye noli adi mede u nadiña meyatdok nadikadaka tiyemgin ⁴² kañ Jesudi yenimbune buña bopneune indin yeninguk, “Me nadisukilitihinit mokitdi mapme ila metam nadiyembu foune tipilapilaye kwanai titindok yeningigine tiin. Kañ me lolonhinit adi me fofonhinit yehitiñafoon me bombongi tiin, hidi a nadiin. ⁴³ Ingon hidi adi undun mu tiyaneen. Hidi’walaanin nediyeñ lolonhit tibe nadiña kañ noli hogohogok hidi’walañ lekingonhik ginen me fofonhit hatiña tipilapilaye kwanai tuluwaak. ⁴⁴ En nindi talitimen tibe nadiña kañ noliniye’walañ tipilapilaye-me hatiluwaak. ⁴⁵ Undun doktiña Me Kobumun adi kwetfolon inon tipilapilaye timindok mu foguk, adi tobo metamdok tipilapilaye tiyemiña hatihatinindi yehituwawe foguk.”

*Jesudi Batimaio dausipmik tubukedebaguk
(Matiyu 20:29-34; Luk 18:35-43)*

⁴⁶ Jesu tiña mihiniye adi woon Jeliko yokwetnen wosuwagin. Ala Jesu adi mihiniye gut yokwet u bikabuna ulune metam bop wapumdi nongon ugin. Kañ Timaiyo mihinin Batimaio adi dawi sipmakan doktiña buña talipmen ila nayo tuluguk. ⁴⁷ Adi Jesu Nasaletnin bulak u nadiña indin kutiguk, “Jesu, Dewit’walañ yalaki, nutok bulaningon nadiwen.”

⁴⁸ Undun kutiguk kan metam nolidi nintono kabup iitdok nihep tigin. Ingon adi tobo gigin tina wapumgon hinek kutiguk, “Dewit’wala yalaki, nutok bulaningon nadiwen.”

⁴⁹ Undun kutiguk kan Jesu ungon yali metam yeninguk, “Nimbune ingon bek.”

Yeninguk kan me dausipmik u indin kutiningin, “Jesu ‘ben’ ganilak ale nadifo tina pilali ben.”

⁵⁰ Undun kutinimbune dahidahinjin ungon kwi-hikameen pilali tatakula buguk.

⁵¹ Bune Jesudi ninadiguk, “Nu mangon tigambit yona kutinanilan?”

Undun ninadiguk kan me dausipmikdiboninuk, “Hinale, nu dau diwediwe tibe nadilat.”

⁵² Undun yobune Jesudi ninguk, “Nadisukilitigedi gehitubu-kedebalak ale wen.” Undun nilune nai unaningon dawi tombune diwedakaleen Jesu keletauguk.

11

Jesudi donki folon Jelusalem yokwet maanen foguk

(Matiyu 21:1-11; Luk 19:28-40; Jon 12:12-19)

¹ Jesu en mihiniye adi Jelusalem tubudulanila Oliwa Tuwai folon Betefage dut Betani yokwet ikamuknen wosuwagin. Unon wosuwagan Jesudi mihiniyat lufom mede indin yeninga yeningkulu timen ugumuk. ² “Yokwet gu hataknen ungon woon donki mihinin nin tehinjit yalek kademek. Adi folon nebek nemu lo ila yaugin u fiyali nagi ingon budemek. ³ Kan nebek nin di u

manjonde tamuk haninadiune kan indin nindemek, 'Wapumdi yolak doktiņa nagiwoon kotigon nagi budim.' ”

⁴ Undun yenimbune woon yokwet maanen foon donki mihinin talik unambunat tiinnen talik gagayen yot yeyemen tehigin, u lokan ⁵ yafiyatu me noli yamanjon yakin adi yabuna yeninadigin, “Manjonde fiyakamuk?” ⁶ Undun yonadigin kan adi Jesudi mede yoguk undugon hinek yenimbu nadiyemgin.

⁷ Kan fiyali nagila woon Jesu en mihiniye noli hakinen wosuwaan dahidahi wahininjik kwi-hina mongola donki sigin folon iune Jesu loon ikuk. ⁸ Metam noliyen dahidahi wahininjik kwi-hina mongola talik folon gulup itaugin, noliyen bem tanenin hapmunhinit fidoko mongo talipmen boituwat tigin.

⁹ Kan metam bop wapumdi timen mindan tiņa indin kutiņa kakaligin, “Nintilonim! Me i Wapum wou ginen bulak, Bepandi kahan timimbek! ¹⁰ Betnik Dewit'wala Hatihati Kobuli bulak i Bepandi kahan timimbek! Bepan kunum ginen nintilonim!” ¹¹ Undun toņa woon Jelusalem wosuwaan Jesu Silonyotnen foon nemenemek unon yabudapmau bufaguk kan fowoon mihiniye dut Betanide ugin.

*Bem fik adi Jesu manin mede keleen kumunguk
(Matiyu 21:18-19)*

¹² Heleune hanin Betani bikabuna unila talipmen Jesu map nadiguk. ¹³ Ala kweetnin yali bem fik nin hapmun kan nadiņa foloonnit be yo uguk, yamanjon woon kaguk ingon nainin mon

doktiņa hapmun hogok yabuguk. ¹⁴ Undiniņ kan Jesudi indin niņguk, “Nebek niņdi du’walaanin nanane kotigon nemu nawaak.” Unduņ nimbune mihinijedi mede u nadigin.

*Jesudi Silonyot ginen figifigi mu titindok yoguk
(Matiyu 21:12-17; Luk 19:45-48; Jon 2:13-22)*

¹⁵ Jelusalem wosuwaan, Jesu Silonyot dinin hamuhe ginen foon muneen bombon kibikibi hatigin u yehikelepupuheneen muneen falik en butigili tuwadok boiņa ikin kumopophik udakuyemguk. ¹⁶ Unduņ tiyemiņa metam Silonyotnen uņon bombon mongo uundok kamehep tiyemguk.

¹⁷ Unduņ tiņa yeninguk, “Youkudip ginen Bepaņ’walaņ mede indin hatak, ‘Nu yotne u yadi metam kwetkwet hatiņ heki’walaņ ninadi yot unduņ yoneen.’ Ingon hidi unduņ tubune kubome heki’walaņ hebihathik kwet dabugon tilak!”

¹⁸ Unduņ tubune metam adi Jesu medeņin nadiune uņgonin hinek tuguk, doktiņa Silonyot dinin talitimen wapuhi en Yodoko Mede hinale hekidi Jesu kan munta tiņa dedin hinek tiņa ulukumunim yonā kiyonadi tigin. ¹⁹ Unduņ doktiņa tebeledalune Jesu adi mihinijedut yokwet wapum u bikabuņa ugin.

*Nadisukiliti foloon tiņa Bepaņ ninadidok
(Matiyu 21:20-22)*

²⁰ Hanin timin pilali ugin. Talipmen woon bem fik sigeneen kumuņa yakuk. ²¹ Kan Pita adi Jesudi mede yoguk u naditomuņa niņguk,

“Hinale, i kalan, du bem i nihegun kan agan sigeneen yatak.”

²² Undun ninguk kan adibo yeninguk, ²³ “Nu biyagon hinek hanimbit. Hidi welelufom mu tinja Bepan nadisukiliti-mihinakan kweboboe i kweli bikabuna tatakula imengwan ginen fofondok nimbune kedem tibek. ²⁴ Undun doktina indin hanimbit. Hidi Bepan nemek nindok ninadina kan agan nimbek hinek u nadisukilitina niyaneen wondok hamuluwaak. ²⁵ Ale ninadi tine kan me noli’wala kadakanin bimina Behik kunum ginen ninadiune hidi’wala kadakaninhik kedem bihamuluwaak. ²⁶ [En hidi me noli’wala kadakaninhik mu biyembune Behik kunumnenin adi maan undugon hidi’wala kadakaninhik mu bihamuluwaak.]”

*Jesu’wala saninindok ninadigin
(Matiyu 21:23-27; Luk 20:1-8)*

²⁷ Jelusalemde kotigon udaneen ugin. Woon Jesu Silonyot dinin hamuhe ginen foune Silonyot dinin talitimen wapuhi, en Yodoko Mede hinale en me wapuhi adi woon indin ninadigin, ²⁸ “Du nediyeendi kwanai i titindok saninin gamuna ganindapmaune tilan?”

²⁹ Undun ninadigin kan Jesudibo yeninguk, “Nubo mede-kabe kubugon hinek haninadiwit, kan u tubu-udaneune habuna nubon nediyeendi kwanai i titindok saninin namuna nanindapmaune manin mede tagimneen kwanai i tilat wendok hanimbit. ³⁰ Jon Imeyout kwanai tuguk u neendi nindapmaguk. Bepandi be kwetfolon medi nindapmagin?”

³¹ Unduŋ yeninadiune adi mede toboniŋ dedin tubu-udanenim yonŋa nehi uŋgoŋ kiyonadi tigiŋ. “Indi Bepaŋ yonim adi indin ninimbek, ‘Kaŋ hidi maŋgoŋde medeŋiŋ mu nadisukilitigiŋ?’ ³² Tiŋa undugoŋ metam hogohogokdi Jondok polofet niŋ doktiŋa kwetfoloŋ me yonene adi dedin tinimneneŋ.” ³³ Unduŋ yonadibediŋa moŋ kaŋ “Mu nadiyam” niŋgiŋ.

Kaŋ Jesudibo yeniŋguk, “Hidi mu yobihikiŋ doktiŋa nu undugoŋ neeŋ nanindapmaune kwanai i tilat u nu maan mu hanimbit.”

12

*Me niŋ wain fiye diniyetiŋa kwet niŋ uguk
(Matiyu 21:33-46; Luk 20:9-19)*

¹ Unduŋ yeniŋa yoyout mede indin yeniŋguk, “Me niŋ adi wain fiye tiŋa gimbahan ibikelemadi tuguk. Unduŋ tiŋa wain folooŋ yalifilifiliyedok bom niŋ dobuŋa malin tutumbaguk. Unduŋ tiŋa me looŋ yali fook titiŋdok falik ibiguk. Unduŋ tubudapmaan wain fiyeŋiŋ me noli yenimbu kadokoune ne niŋkade uguk. ² Ala hatige hatige wain agan folooŋ moŋgotdok nai tuguk kaŋ aditok nenobu boineŋ yonŋa tipilapilayeŋiŋ niŋ niŋkulune buguk. ³ Kaŋ me wain fiye kadoko tigiŋ hekidi wihitnadiŋa hogok kameune udaneen uguk. ⁴ Kaŋ kotigoŋ niŋbo nimbune buguk, u maan honeen mebi foloŋ ulaŋa nemek mekaŋmekan timiŋgiŋ. ⁵ Unduŋ tigiŋ kaŋ niŋbo nimbune buguk u ulukumun tigiŋ. Kaŋ mindan me noli yenimbu bugiŋ u noli widihiŋa noli widihikumun tigiŋ. ⁶ Kaŋ mindan hinek ne mihiniŋ

welenđi kahileguk u kameu buune medenđi ke-dem nadiŋa nemek momoonđ timinenđ yonŋa nimbune buguk. ⁷ Ingonđ me wain fiye kadoko tiginđ heki adi kanđ yoginđ, ‘Adi kuyendi hatigene wain fiye i kahilewaak onđ! Undonđ doktinŋa ulukumunŋa wain fiye i indetok kahileneem.’ ⁸ Undonđ yonŋa me u ulukumunŋa gimbahanđ magingenđ tukukinđ.”

⁹ Undonđ yenindapmaanđ indinđ yeninadiguk, “Undonđ tubune wain fiye molom adi dedinđ tibek? Wabinŋa ne bunŋa me wain fiye kadoko tiinđ u widihikumunŋa wain fiye u me nolidok yembek.

¹⁰ Youkudip Mede i mube kunali kainđ?

‘Yot mamanđ me hekidi taka fofoonđ ninđ monđ yo tukukinđ ingonđ taka u mindanđkade taka kobumunđ mintaguk. ¹¹ Wapumdi kudi u tuguk u kanene ungoninđ hinek tilak.’”

¹² Yoyout u Judahi me talitimenđ heki aditok yenilak u aganđ nadikiyondaanđ Jesu honeenđ uut-dok nadiginđ ingonđ metam doktinŋa nadibedi tinŋa bikabunŋa uginđ.

Jesu muneenđ dok ninadi tiginđ

(Matiyu 22:15-22; Luk 20:19-26)

¹³ Judahi me wapuhidi Falisi noli enđ Helot’walaŋ me nolinđiye yeninđkulu woonđ Jesu tikamanda timimbune nemek neenđ yokadakaune honeenđ mede ginenđ kamenđdok yonŋa yeninđkulune uginđ. ¹⁴ Jesu hakuknenđ woonđ ninđinđ, “Hinale, indi du’walaŋ mebige aganđ nadiyam, du mede biyagonđ hogok yolaŋ. Tinŋa undugonđ, du nebek ninđdok munta mu tilaŋ, me lolonđnit be fofonđnit wanakanđ mede didimeninđgonđ ninilaŋ. Enđ mede biyagonđ ginenđ hogok metam Bepaŋ’walaŋ

titinjin momoon ninindidimelan. Undun doktina ninimbu nadinim. Indi Lomahi'wala mapme Sisadok takis kameyam u du nadiune kedem be tilak be mon? ¹⁵ Muneen u kedem kameyaneem be mon?"

Undun yobune Jesu adi yalan'hih dinin mebi u agan kanadina indin yeninguk, "Hidi mangonde naninkamanda tiin? Muneen neen tina bu nam-bune kawit." ¹⁶ Undun yenimbu muneen nin tina bu mingin kan yeninguk, "Welewele tina kudi i nedi'wala?"

Kan yogin, "Sisa'wala."

¹⁷ Kan Jesudibo yeninguk, "Nemek Sisa'wala u Sisadok miyaneen, en Bepan'wala u Bepandok miyaneen." Undun yenimbu adi nadina boho tigin.

*Kumuja pilapilatdok Jesu ninadigin
(Matiyu 22:23-33; Luk 20:27-40)*

¹⁸ Adi ulune Sadusi hekidibo Jesu ninadine bugin. Me heki u metam kumuja koti mu pilatneen yoyagin ala buja ningin, ¹⁹ "Hinale, Mosesdi Yodoko Mede indin youtninguk, 'Me nin adi tam tina wapmihi nemu yehitubu-mintaan kumumbune kan me wendinin kwayandibo tam kahat unakon nagila wapmihi me kumun tuguk-dok yehitubu-mintamiluwaak.'

²⁰ "Indi'walahi hekidalit 7 hatigin ala Tu-wodi tam nin nagikuk. Nagila wapmihi nemu yehitubu-mintaan kumunguk. ²¹ Kan Monedibo tam kahat unakon nagikuk, ingon wapmihi nemu mintaune kumunguk. Kan Gikdibo tam unakon nagila undugon tuguk. ²² Undun hogok titawoon

kwayahik dikinenḡi nagila kumumbune tam u maan hogok hatinḡa kumunguk. ²³ Me hekidalit 7 adi tam kubugon unḡakon nagikin ala kougon nai wapum folon pilatneenen tam u neditok tibaak?”

²⁴ Undun ninadigin kan Jesudi yeninguk, “Hidi Yodoko Mede be Bepan’walaḡ saḡinin mu kana-didakaleen mede yogiyondafit tiin. ²⁵ Indin nadinen, kougon nai wapum folon pilali metamdi hekimalam mu tineen. Adi kunum folon anelo hatiin undihi mintaan hogok hatineen.

²⁶ “Tinḡa hidi kumuḡa pilapilatdok maan yoin doktinḡa indin hanimbe nadinen. Moses’walaḡ pepa ginen kahat nin bem daguk wondinin hatak u hidi mu binek kunali nadidakalein. Unḡon indin youkin, ‘Bepandi Moses indin ninguk, “Nu Abalaham en Aisak tinḡa Jekop heki’walaḡ Bepan.”’ ²⁷ Adi yadi kumuhi’walaḡ Bepan mon. Adi yadi kaipmuhi’walaḡ Bepan. Undun doktinḡa hidi mede yotubugiyonda kisaḡ hinek tiin.”

Jesu Yodoko Mede wapum be lolonitdok ninadigin

(Matiyu 22:34-40)

²⁸ Undun yenimbune Yodoko Mede hinale nin adi Jesudi Sadusi heki mede momoon hinek tubudaneyemguk kan nadinḡa adibo buḡa indin ninadiguk, “Yodoko Mede denḡi noli yalakapmeen timen hinek tilak.”

²⁹ Undun ninadiguk kan Jesudi ninguk, “Yodoko Mede timentimen hinek adi yendi tilak: ‘Isilaehi, hidi nadinen. Wapum ne kubugon adi Bepanḡnik.

³⁰ Undun doktinḡa du Wapum Bepange welege be munabulige be nadinadige be saḡiningedi aditok

hogok mindapmaluwaan.’ ³¹ ‘En datok nadi-lan undugon hinek metam nolidok nadiyemu-luwaan.’ Yodoko Mede lufom yendi wapuhi be lolonjit hinek tamuk.”

³² Undun nimbu Yodoko Mede hinaledi yoguk, “Kedem hinek, hinale, du yolan u biyagon. Wapum ne kubugon adi biyagon Bepanjik, adi undinin nimaangon nemu hatilak. ³³ Undun doktina metam adi welehi be nadinadihi be saninhihi u aditok hogok mindapmayaneen, tina nehitok nadin undugon metam nolidok nadiyemaneen, Yodoko Mede lufom yendi yom bibindok hemundumundune mebimebi u yalakapmeyamuk.”

³⁴ Jesudi medenin nadiune utumbau ninguk, “Du Bepan’wala hatihati kobut agan tubudula hinek tilan.” Mede u yodapmaune munta tina kotigon nebek nin di yonadi nemu tigin.

*Jesudi Kilistodok yeninadiguk
(Matiyu 22:41-46; Luk 20:41-44)*

³⁵ Jesu Silonyotnen Mede Momoon yeninga yonadi nin indin tuguk, “Yodoko Mede hinale heki adi mangonde indin yoin, Kilisto adi Dewit’wala yalakinin? ³⁶ Ungonin Munabulidi Dewit indin nimbune yoguk, ‘Wapumdi nu’wala Wapumne indin ninguk, Du kohone didimeninnekade itune memikgeye kayoge falipmen yapmewaat.’ ³⁷ Dewit adi ‘Wapumne’ ninguk kan dedin tina Kilisto adi Dewit yalakinin tilak?”

*Yodoko Mede hinale hekidok yoguk
(Matiyu 23:1-36; Luk 11:37-54; 20:45-47)*

Undun yobu metam nadifo folon ila nadigin.
³⁸ Mede yeniņa indin yeninguk, “Yodoko Mede hi-
nale heki hatiinnej doktiņa nadinadinila hatiya-
neen. Adi yadi tinahukut kweheyehi tiņa
yowawaliwen uune metamdi momoon tiyemiņa
yeniutumba titindok nadiin, ³⁹ tiņa hinamuni nai
ginen be bopyotnen me wohiyenit’walaņ pop
folon iitdok nadiin. ⁴⁰ Adi tam kahat heki yohinen
woon yalaņ yeniņa kubo tiyemiindigon metam
dauhik ginen Bepaņ niutumba nai kweheyenin
hati tiin. Me heki undihi adi hatigene kougon
kibikon malabumun hekineen.”

*Tam kahat nin muneenņin Silonyotnen boidap-
maguk*

(Luk 21:1-4)

⁴¹ Jesu Silonyotnen foon silon boiboi taginnej
gagayen ila yabune metam buņa muneen boigin.
Me muneenħinit adi buņa wapumgon-kabe
boigin ⁴² kaņ tam kahat fiywakaņ nin adi buņa
muneen gimih lufom hogok boiguk. ⁴³⁻⁴⁴ U kaņ
mihinņiye yenimbune buņa bopneune yeninguk,
“Biyagon hinek hanilat, metam hogohogok noli
muneenħik boinjit ingon dumunħikdok ungon
hayembune boinjit. Kaņ tam kahat fiywakaņ adi
u-kabe boihatilak u agaņ boidapmaņak doktiņa
adi boinak wendi noli boinjit yalakapmen tiņa
wapumgon hinek boinak.”

13

Jesudi kawadeyot fofohidok yoguk
(Matiyu 24:1-2; Luk 21:5-6)

¹ Jesu Silonyot binja folune mihinj ninđi ninguk, “Hinale, kawade yot fofohi hinek gu yabenj.”

² Undun ninguk kan Jesudibo ninguk, “Kawade yot fofohi u yabulan u memik hekidi ubulagineen youpupuhene-kudapmaune molomolom mapupuheneen ila-uneenj.”

Nai wapum dininj mede

(Matiyu 24:3-14; Luk 17:22-24; 21:7-19)

³ Jesu Oliwa Tuwai folon itune Pita, Jems, Jon aganj Endulu nehi hogok lokaan ninadiginj, ⁴ “Nemek u nai deninj hinek mintawaak, ninimbune nadinim, enj nai dulalune timen mangonj mintawaak?”

⁵ Undun ninadiginj kan Jesudibo yeninguk, “Tikamanda tihamunja nadinadihik tubugiyondaneen ala nadinadinila hatiyaneen. ⁶ Metam feedi bunja nu wotnene folon yokamanda indin tineen, ‘Nu na inakonj.’ Undun yonja metam fee yehitubu-giyondaneen. ⁷ Hidi mik wapum mintaune gigilitnj nadineen, be mik kwet ninjade gwanj mintawe tubune gigitnj hogok nadinja munta tinja heheleen nadibedinja nai aganj dulalak mu yoneen. Nemenemek undihi mintaneen ingonj nai wapum adi pilap mu mintawaak.

⁸ “Kwetkwet mik mintaune kwet wapuhi be kwet kuyahi adi nehi ungon kibikibi mindobuneen. Kan yokwet noli ginenj map wapum mintawaak, enj kwetkwet kenim titawaak.

Nemek hogohogok u mintawaak, kan nai wapum dinij folofigita adi nai unjanij tububihila tamwoidi wapmihi yanagitne nadiij undinij mintawaak. ⁹ Hidi hide nadinadinila hatineen. Nutok tinja Mede Momoon yoneen kan hanagila mede ginen hapmeneen, en bopyotnen hanagila foon hehiwihitnadineen, en me mapme lolonhinit be me wapuhi heki'wala namandahik ginen loon yali Mede Momoon yohautaneen. ¹⁰ Timen Mede Momoon nedi kwetkwet hautadapmaune nai wapum mintawaak. ¹¹ Gigitne yoyauneen kan hanagila mede ginen uneen kan mede dedin yodok wendok nadibedi mu taneen. Mede yodok nai tubune Ungonij Munabulidi hanimbune yoyaneen.

¹² “Me noli nehi'wala kwayahiye be dahiye bolik tiyembune widihikumuneen, be behiyedi wapmihihiye bolik tiyembune widihikumuneen be wapmihidi mehim-behiye'wala mede wobunja bolik tiyembune widihikumuneen.

¹³ Tinja metam hogohogok nutok tinja hidi habukwihita tineen. Ingon nemek undun mintalune nebek nin fafae tinja hatibaak adi Bepandi tubulodaune Hatihati Kobuli kahilewaak.”

Nai kadakanij hinek

(Matiyu 24:15-28; Luk 21:20-24)

¹⁴ (Nebek i kunatan, du kunali nadidakale hinek tiben.) “Nemek kadakanij hinehinek wendi kwet mu yayatdok ginen yalune kan metam Judiya kwetnen hatineen hidi momon tuwai folon loneen. ¹⁵ Be me nin yot folonij

halaak adi foon tinahukutnjn kalin yot maanen mu fowaak, ¹⁶ be me nin kade ginen hat-ibaak adi yopmande tinahukutnjn kalin mu waak. ¹⁷ Hidige! Nai unanj, tam mihiwelehinit en tam eyanhinit adi kada, dedin tineen. ¹⁸ Nemek u kadakanin hinek mintawaak dok-tin hidi Bepan ninadiune u gwi nai ginen hinek mu mintawaak. ¹⁹ Koom tububihila Bepandi kwet kunum yehitubu-mintaguknen nemek malabumun mintagin ingon yendi yalakapmen tin mintaune mindan kotigon undinin nemu mintawaak. ²⁰ Nemek malabumun u nai kweheyeningon mintadok ingon on, Wapumdi metamjiye koom netok gigit yehidaneguk aditok nadinai nai-kabe ulatifoguk. Nai mu ulatifowe tuguk binek wa nebek nemu hatiluwek, kumundapman tanen.

²¹ “Nai unanj nebek nin di ‘Kilisto inon hatak,’ be ‘Kilisto gwan hatak,’ hanimbune medenin mu nadimineen hinek. ²² Nai unanj Kilisto yalayalan en polofet yalayalan fee mintaan kudi wapuhi saninin hinit titauneen. Undun tin Bepandi metam netok gigit yon yabukahileguk u nadisuhik tubugiyondadok kwanai tineen, ingon adi nadisuhik tubugiyondadok saninin mu hatak doktin kwanaimin tineen. ²³ Nemek mintawaak hogohogok u agan hanimbihitat. Undun doktin nadinadinila hatiyaneen.”

*Me Kobumun busuwawaak nainin
(Matiyu 24:29-31; Luk 21:25-28)*

²⁴ “Nemek malabumun u mintaune yagigi mu hatinila meledibo mambip tibaak en

muyakip maan hauta mu tibaak, ²⁵ kan bamholiŋa heki kunum gineniŋ kwehik biŋa diliteleen maneen. Kan kunum mahamulune nemenemek hogohogok waliwali tiŋa igiyonda tineen. ²⁶ Undun tineen kan nai uŋaniŋ Me Kobumun adi mulukwan folon hauta holiholiŋe tiŋa saŋiniŋ wapumnit busuwaune kaneen. ²⁷ Busuwaan aŋeloniye yeniŋkulune kwet tububihila hali woon dan hadapmalak wendok tuwot tuntuŋ fodapmaan metamniye yabukahileen yehidaneguk hogohogok u yehibopneneen.”

Jesudi kone folon yoyout tuguk
(Matiyu 24:32-35; Luk 21:29-33)

²⁸ “Bem kone u kan nadinen. Hapmun madapmaune hapmun gitipmun duhulak kan meleyan nai yoyam. ²⁹ Undugon hinek nemek u mintaune kan agan nihitubu-dulaan yeme folon yatak nadiyaneen. ³⁰ Biyagon hinek hanimbe nadinen. Metam kumundapman mu tulune nemenemek i mintawaak. ³¹ Kwetkunum adi liwe tidemeek iŋgon nu’walaŋ medene adi tuwot mu liwewaak.”

Nebek niŋdi helebuŋa nai be mele nai mu nadilak
(Matiyu 24:36-44)

³² “Tiŋa nebek niŋdi helebuŋa nai be mele nai deniŋ hinek nemek i mintawaak u mu nadilak. Aŋelo heki kunum gineniŋ hatiŋ adi maan mu nadiŋ. En Bepan mihiniŋdi maan undugon mu nadilak. Bepan ne hogok nadilak. ³³ Undun doktiŋa nadinadiŋila hatiyaneeŋ, nai hinek mu

nadiin doktiŋa damodamo mu taneen, hautakut tiŋa hatiyaneen.

³⁴ “Nemek u mintawaak adi indiniŋ. Me niŋdi yoli bikabuŋa dambek wene tipilapilayeniye kwanai molomolom daneyemiŋa me yeme kadoko tilak adi yeme momoonŋon kadokowek niŋa yaulak undiniŋ. ³⁵ Yot molom adi deniŋ hinek baak. Tebele bek, be timiŋ lekiŋon bek, be helehelede, be haniŋ bek, u hidi mu nadiin doktiŋa nadiŋila woom tiŋa hatiyaneen. ³⁶ Tigene pilap nobu busuwaan habune damo deihtneneŋ ala. ³⁷ Unduŋ doktiŋa hidi be metam noli wanakaŋ indiŋ hanilat, busuwabusuwa nainiŋdok woom tiŋa kaipmuŋ hatiyaneŋ.”

14

Jesu uutdok talii lohigin

(Matiyu 26:1-5; Luk 22:1-2; Jon 11:45-53)

¹ Anelodi Yabukiyondaan Yalakapmegukdok eŋ belet haguwonit mokit, sipakaŋ wondok hinaŋ titiŋdok helebufa lufomuk hatune, me Silonyot diniŋ talitimen eŋ Yodoko Mede hinale heki adi Jesu dedin tiŋa nehi hogok kabup honeen nagi woon utnim yonŋa talii lohigin. ² Tiŋa indiŋ yogin, “Hinamuni nai folon adi mu tinim. Undinen adi tiyagene metamdi mik tubupilatneeneŋ.”

Tam niŋdi Jesu haguwo ime munduŋ momoon di yougomguk

(Matiyu 26:6-13; Jon 12:1-8)

³ Jesu adi Betani uŋon Saimon koom wede haki tuguk adi yolineŋ nanaje hanalune, tam niŋ adi foon ime munduŋ momoon hinek wou

“nat” yoiŋ, toutŋiŋ kawadedi tigiŋ eŋ tuwaŋiŋ adi lolonŋit hinek, u tiŋa buŋa tout maŋiŋ ugoloŋ ime u Jesu mebi foloŋ yougomguk. ⁴ Kaŋ metamdi kaŋ nadikadaka tiŋa nehi ungoŋ indiŋ yogiŋ. “Maŋgoŋde ime munduŋ momooŋ hinek i tububi tilak? ⁵ Ime u 1 tausen* kinadok tuwaune muneen fiyewakahi yemdok ingoŋ unduŋ tilak” yonŋa ninto kisaŋ hinek tigiŋ.

⁶ Unduŋ tigiŋ kaŋ Jesudi yeninguk, “Bikabune tibek. Hidi maŋgoŋde tam i malabumuŋ miŋ? Adi titiŋ momooŋ tinambune kawē utumba tilak. ⁷ Me fiyewakahi adi helemahelman hidut ingoŋ hatiyaneen, ale nai noli foloŋ yehitubu-lodane kaŋ kedem yehitubu-lodayaneen. Nu adi hidut yagigi mu hatibaat ⁸ doktiŋa adi nemek tinamdegoŋ tiŋak. Adi ime munduŋnitdi nedegomuŋak u denimbek nehiweneneendok timen nehiuli-dokolak. ⁹ Nu biyagoŋ hinek hanilat. Kwetkwet danŋoŋ wooŋ Mede Momooŋ yohautatauneen unŋoŋ tam yendi nemek momooŋ tinamuŋak wendok maan yohautaneen.”

Judadi Jesu memik kohohik foloŋ kamenŋdok yoguk

(Matiyu 26:14-16; Luk 22:3-6)

* **14:5:** Koom behepner mede ginen 30 kina youkiŋ eŋ Bagi Mede ginen 300 kina youkiŋ. Kaŋ Numangoŋ mede ginen 1 tausen kina youkumun u mebi indiŋ doktiŋa molomolom youkam. Koom gulet kubugoŋ maanen muneen kwanai tiŋa muneen beyagiŋ u tuwaŋiŋ fofonŋit. Ingoŋ kobuk nai indinde gulet kubugoŋ maanen muneen kwanai tiŋa muneen beŋ adi lolonŋit. Unduŋ doktiŋa kunakunat molomolom youkumun.

¹⁰ Undun tubune Judas Kaliotnin, Jesu mihinin nin adi noliniye biyabuŋa Jesu talitimen heki kohohik folon kameŋdok yonŋa talitimen heki yabe uguk. ¹¹ Wosuwaan mede u yenimbune talitimen heki adi nadifo wapum hinek tigin. Tina muneen mimiŋdok yofolokenegin u nimbune nadiŋa Judas adi tali dedin folon Jesu kohohik folon kameŋdok yonŋa woom hatiguk.

Jesu mihiniye dut nanane nonŋon nagin
(*Matiyu 26:17-25; Luk 22:7-14, 21-23; Jon 13:21-30*)

¹² Belet haguwonit mokit, sipakan dinin hinamuni titiŋdok en Aŋelodi Yabukiyondaan Yalakapmeguk wondok hinamuni nai tubune dompa widihigin nai unanin Jesu mihiniyedi indin ninadigin, “Indi kamiŋ kwet denŋon Aŋelodi Yabukiyondaan Yalakapmegukdok hinamuni tiulidokogamnim?”

¹³ Undun ningin kan Jesu adi meyat lufom mede indin yeniŋa yeniŋkukuk. “Yokwet wapumnen wosuwaune me nin ime kabotnit buŋa hehitubu-mintawek. Kan me unakon keletaunen ¹⁴ yopman foune nonŋon foon yot molom u indin nindemek. ‘Hinaledi indin ganilak, Mihineye indi Aŋelodi Yabukiyondaan Yalakapmeguk dinin nanane nanimdok yotmaan denŋak?’

¹⁵ Undun nindemek kan adi yotmaan wapum folonin, kumopop en falik ila nanane nanandok agan koom tiyeyekegin u hanimbune nanane unŋon tiulidokodemek.” ¹⁶ Undun yenimbu meyat u me nohiye noli Jesudut unŋon biyabuŋa yokwet wapumnen woon nemenemek Jesudi

yeninguk undugon hinek tubumintaan Anelodi Yabukiyondaan Yalakapmeguk wondok nanane tiulidokogumuk.

¹⁷ Ala bufalune Jesu adi mihiniye 12 dut ¹⁸ buja nanane falik ikelemadina nanane nanila indin yeninguk, “Nu biyagon hinek hanilat. Hidi’walaanin me nindi memik heki kohohik folon napmewek, me u nanane nukut nongon nayamut.”

¹⁹ Undun yenimbune mihiniye adi welemulap tija ila molomolom indin ninadigin, “Nu nobu?”

²⁰ Undun yogin kan Jesudibo yeninguk, “Kwanai u me tuwelup hidi’walaanin me nindi tibek, me u beletnin nukut malin ginen wanan kupmayamut. ²¹ Me Kobumun adi Youkudip Mededi yolak wendok tuwot kumun ginen waak. Ingon me nagila memik kohohik folon kamewek adi yadi malabumun wapum hekiwaak. Me kada, mangon tibe mintaguk.”

Jesudi mihiniye dumun yemguk

(Matiyu 26:26-29; Luk 22:15-20; 1 Kolin 11:23-

26)

²² Nanane hanaanila Jesudi belet nin tija Bepan niutumbaan wobuna mihiniye indin yenina yemguk, “Tija nanen. I na’walan foloone.”

²³ U yemina ime toutbo tija Bepan niutumbaan kameu uune mihiniye hogohogok ungon nagin.

²⁴ Kan yeninguk, “I na’walan nangatne, u yofolok kobuli tija metam feedok kwatnelat. ²⁵ Tija indin hanimbe nadinen. Nu wain kwetfolon inon kotigon nemu naan hatigene kougon wain gitipmun Bepan’walan Hatihati Ungonin ginen

ilaŋa nawaat.” ²⁶ Unduŋ yodapmaune kap niŋ todapmaan foon buŋa wooŋ Oliwa Tuwai folon login.

Pitadi Jesu mu bikabaak yo yogigine tuguk
(Matiyu 26:31-35; Luk 22:31-34; Jon 13:36-38)

²⁷ Uŋoŋ looŋ Jesudi mihinjiye indin yeninguk, “Youkudip Mededi indin yolak, ‘Nu dompa kadokome ulukumumbene dompa heki adi u kaŋ momoŋ kwetkwet udapmaneen.’ Unduŋ yolak doktiŋa hidi nadisukilitihik fiyalune binabuŋa momodapmanen. ²⁸ Unduŋ tinen inŋoŋ nu kotigoŋ kaikaan pilaliŋa Galilide timen waat.”

²⁹ Unduŋ yenimbune Pitadibo medenjin indin tubu-udaneminguk, “Mihigeye noli bigabuŋa momonen inŋoŋ nu tuwot mu bigabit hinek.”

³⁰ Unduŋ ninguk kaŋ Jesudibo Pita ninguk, “Biyagoŋ hinek ganimbe nadiwen. Kamin timin yendok pupup nai lufom mu kutibune du nu mu nadinamulan nai lufomkulitnin yoben.”

³¹ Unduŋ nimbune Pita adi gigin tiŋa medenjin kotigoŋ fafaŋenŋoŋ indin tubu-udaneminguk, “Da gula nu maan nulukumundok yonen, inŋoŋ nu mu nadigamulat mu yobit. Moŋ hinek!”

Kaŋ Jesu mihinjiye nolidi maan tubulodaan undugoŋ yogin.

Jesudi Getsemani uŋoŋ Bepaŋ ninadi kwanai tuguk

(Matiyu 26:36-46; Luk 22:39-46)

³² Unduŋ yonŋ ugin wooŋ kwet niŋ wou Getsemani uŋoŋ wosuwaan Jesudi mihinjiye indin

yeninguk, “Hidi ingon hatune nu Bepan ninadi-wit.” ³³ Undun yeniŋa adi Pita, Jems en Jon hogok yanagila ugin. Woon welemulap wapum hinek nadiŋa nadimalabudan ³⁴ mihiniye indin yeninguk, “Welemulap kisan hinek nadiŋa kumundegon nadilat ale ingon hali nehiulihilune Bepan ninadiwit.”

³⁵ Undun yeniŋa kabe-muninin uyeen kwet-folon maan hali folofigita mu nadidok kedem nobu yo Bepan indin ninadiguk, ³⁶ “O me Ban, nemenemek du’walaŋkade adi kedem doktiŋa folofigita i nolomtiben. Ingon nu yolat wendok-tiŋa mon, da nadilan undun tiben.”

³⁷ Undun ninadiŋa kotigon udaneen buŋa mihiniye lufomkulitnin damo hadeitu yabuŋa Pita indin ninguk, “Saimon, du nehiulihina damo kaipmun-kabe nemube ilen ale damo hogok tilan?” ³⁸ Pita undun niŋa yeninguk, “Tigene tikamanda ginen gweheyeen maneeneŋ doktiŋa hogok-kabe nin halina ninadi kwanai tinen. Welehiŋ adi loda tilak ingon foloohikdi malabuda tilak.”

³⁹ Undun yeniŋa kotigon woon Bepan koom ninadiguk undugon ninadiguk. ⁴⁰ Ninadiŋa kotigon udaneen buŋa mihiniye damo deiŋakagin buŋa yabuguk, adi dauhiŋ malabuda tubune damo hogok deiŋakin en Jesu mede debek ninindok mu nadigin. ⁴¹⁻⁴² Buŋa yabuŋa kotigon woon udaneen buguknen buŋa yabuŋa yeninguk, “Hidi damo dahakulema kwanai kougon be ha tiin? Agan tuwot deiŋin, nai agan bulak ale pilalu unim. Me Kobumun adi agan bolik titin medi

kadakanin titin heki'walaŋ kohohik folonj kame-lak."

Judadi memik yanagila uguk

(Matiyu 26:47-56; Luk 22:47-53; Jon 18:2-11)

⁴³ Jesu adi mede hayenilu mihinjiye 12'walaanin me ninj wou Judas tinja mebop wapum adi Judahi'walaŋ Silonyot dinin talitimenj enj me wapuhi tinja Yodoko Mede hinale heki yeninŋkulune mik dinin bombon wanaŋ monŋgola Jesu tinja mihinjiye hakinŋnenj bugin. ⁴⁴ Buŋa Jesu memik kohohik folonj kameŋdok Judasdi nolinjiye indin yeninguk, "Nu me loonj honeen singongome tibit kaŋ unakonj honeen kadoko fafaŋeninj hinek tinjila nagi unenj." ⁴⁵ Undun yeninja unaningon Jesu tinja mihinjiye hakinŋnenj busuwaanj loonj Jesu indin ninja singongomeguk, "Hinale." ⁴⁶ Kaŋ me heki wendi Jesu honefafaŋe tigin. ⁴⁷ Kaŋ mihinjiye nebek ninj yamaŋgonj yakinŋdi miknonj tamali tinja Silonyot dinin talitimenj wapum'walaŋ tipilapilaye-meninj magi filodiguk.

⁴⁸ Kaŋ Jesudi indin yeninguk, "Hidi nu mikbe tubupilale tilat doktinja miknonj enj tebe bohoni tinja nohonene buŋit? ⁴⁹ Nu helemahelmanj hidigut Silonyotnenj metam Mede Momoonj yenin-didime hati tilat, kaŋ nai unanin mangonde mu nohonein? U Youkudip Mededi biyagonj mintadok tiinj."

⁵⁰ Undun tigin kaŋ Jesu mihinjiye hogohogok adi Jesu bikabuŋa momodapmanj tigin. ⁵¹ Kaŋ mekuya ninj tinahukut fafau tuguk adi mindan yehikeletauguk. Yehikeletaune adi maan ho-nenim yo tigin ⁵² inŋgonj momoune tinahukutninj

hogok honeune ungon kwihiboina hambiyek moguk.

Jesu adi me wapuhi en talitimen heki naman-dahik folon yakuk

(Matiyu 26:57-68; Luk 22:54-55, 63-71; Jon 18:12-14, 19-24)

⁵³ Undun tina Jesu nagila Silonyot dinin Talitimen Wapum'wala yoline ugin. Me talitimen en me wapuhi en Yodoko Mede hinale adi koom buna ungon nongan bopneen hakin. ⁵⁴ Undun tubune Pita adi gikingon yali yabukuwali uguk. Wosuwaan Silonyot dinin Talitimen Wapum yoli hamuheneen foon Jesu dedin timinen u kawit yona mikme hekidut kudu hokom ila tuguk.

⁵⁵ Kan me Silonyot dinin talitimen wapuhi en Judahi'wala kansol heki adi mede neen yotubumintaune Jesu uutdok yona mede nadinadi kwanai tigin, ingon nemek nemu tubumintagin. ⁵⁶ Metam feedi mede yala fee habeyeen labu niyagin, ingon kahathikdi molomolom mintaguk.

⁵⁷ Undun tina me noli Jesudi yoguk yo yala nin indin yogin, ⁵⁸ "Indi nadine me i indin yoguk, Nu Silonyot medi magin i kadem uyakulana melenai lufomkulitnin ginen kotigon tubupilalaat, ingon u kohonedi mu mawaat."

⁵⁹ Kahat undun tigin ingon me feedi yogiyongiyone tigin doktina kahathik u foloonit mokit tuguk. ⁶⁰ Kan Silonyot dinin Talitimen Wapumdi pilali namandahik folon yali Jesu indin ninadiguk, "Mede ganiin u biyagon be dedin? Deti dubo mede nemu tubu-udaneyemulan?"

⁶¹ Undun ninadiguk kan Jesu adi mede mu yonə hogok yakuk. Kan kotigon indin ninadiguk, “Du Kilisto Bepan mihinin be?”

⁶² Undun ninadiguk kan Jesudi “Een, nu inakon,” yonə tomboyoula indin yeninguk, “Me Kobumun adi kougon Bepan Saninin Molom kohon didimeninjenkade ila kunum mulukwan ginen buune kaneen.”

⁶³ Undun yobune Silonyot dinin Talitimen Wapum adi kisan nadikadakaan ne’walan tinahukutnin tububulagineen yoguk, ⁶⁴ “Adi Bepan nintifo tilak u hide-ku agan nadiin doktina kotigon aditok mede mu yodok. Ale hidi dedin nadiin?”

Kan adibo yogin, “Kadakanin tinak doktina kumundok gigit tilak.” ⁶⁵ Undun nindapmaan me nolidi maluluk suwambali dawi haule tina ibihenə kohohik wobuna youla ningin, “Du polofet biyagon nobu hatiliwen kan mebigə tubudakalewen.” Undun tubune mikme hekidi nagila woon fawi folon udohokotikukin.

Pitadi Jesu medenin naditomguk

(Matiyu 26:69-75; Luk 22:56-62; Jon 18:15-18, 25-27)

⁶⁶ Adi undun tulune Pita adi hamuhenen fakan yali kudup hekobu yatuguk kan Silonyot dinin Talitimen Wapum’walan tipilapilaye waabi nin di buna kan ninguk, ⁶⁷ “Du maan Jesu Nasaletnin dut ungon hatilan.”

Nimbune Pitadi yokamehebi tina yoguk, ⁶⁸ “Du nemek mede yolan u nu mu nadilat.” Yonə uune pupup kutiguk.

⁶⁹ Kan tipilapilaye waabidigon kotigon kan me nongon yakin u yeninguk, “Jesu dut hatiin me nin inakon.”

⁷⁰ Undun yenimbune Pitadibo kotigon “Nu mu nadimilat,” yoguk.

Kan kabe-muninin yali me nongon yakin dibo ningin, “Du maan Galilinin doktina du adi’walaanin ingon binek.”

⁷¹ Undun nimbune kotigon Bepan namanda folon mede yofafaje tina mede muyoyo yona yeninguk, “Nu me u yoin u biyaku mu nadimilat.”

⁷² Undun yona yanadilu nai unaningon pupup kotigon kutiguk. Kan Pita adi Jesudi mede indin ninguk u naditomguk, “Pupupdi nai lufom mu kutilune du mu nadinamulan nai lufomkulitnin yoben.” Mede u naditomuja welebulaningon hinek nadinja makat kisan kokuk.

15

Jesu Pailat namanda folon yakuk

(Matiyu 27:1-2, 11-14; Luk 23:1-5; Jon 18:28-38)

¹ Helehautaune Silonyot dinin Talitimen wapuhi en me wapuhi noli en Yodoko Mede hinale en Judahi’wala kansol heki wanan bopneen Jesu uutdok yodapmagin. Tina kohon ibikilitina nagila woon Pailat kohon folon kamegin ² kan Pailatdi indin ninadiguk, “Judahi’wala me mapme du-ku be?”

Kan Jesudibo ninguk, “Yolan unakon.”

³ Undun yobune Silonyot dinin talitimen wapuhi adi nemek kadakanin tuguk yo ningin ⁴ kan Pailatdi kotigon ninadiguk, “Nemek kadakanin

fee tugun ganiin kan mangonde mede nemu tubu-udaneyemulan?”

⁵ Undun ninguk ingon Jesu adi mede-kabe nemu tubu-udanemimbune Pailat adi boho kisan tuguk.

*Jesu kumundok nindapmagin
(Matiyu 27:15-31; Luk 23:13-25; Jon 18:39–19:16)*

⁶ Gulet indigon Anjelodi Yabukiyondaan Yalakapmeguk dinin nai folon Judahidi me yot fafajeninen hakagin me nin wou yoyagin kan Pailatdi nadidapmaan ninkulune foon uluguk.

⁷ Ala nai unanin me nin wou Balabas adi me noli dut gapman mik timina me nin ulukumungin kan yanagila yot fafajeninen yapmegin. ⁸ Ala metam buna bopneen fey tagin undun, Pailatdi nebek neen yot fafajeninen nin kulune fobubundok nine bu bopnegin.

⁹⁻¹⁰ Kan Pailatdi Silonyot dinin talitimen wapuhi'wala nadigalikahik agan kan nadiguk. Adi metam feedi Jesu kelegin u yabuna Jesudok nadiune tuwot mu tuguk wendoktina Pailat'wala nagi ugin. Pailat adi u agan nadikabeleen metamdi dedin yonen yo indin yeninadiguk, “Hidi nu Judahi'wala mapme i ninkule foon wek be nadiin?”

¹¹ Undun yeninadiguk kan Silonyot dinin talitimen wapuhi adi Jesudok kibikon Balabas ninkulu fowek yonen yona metam yeningigine tigin. ¹² Undun yogin kan Pailatdi kotigon yeninguk, “Kan Jesu, Judahi'wala me mapme niin, adi dedin timimbit?”

¹³ Undun yeninadiguk kan metam hogohogok adi kutiŋa yogiŋ, “Kolonɗabek folon kumumbek!”

¹⁴ Kan Pailatdi kotigon yeninadiguk, “Manŋon yom hinek tiŋak doktiŋa?”

Undun yeninadiune gibitan kutifiyeen yogiŋ, “Kolonɗabek folon kumumbek!”

¹⁵ Undun yogiŋ kan Pailat adi metam yehitubu-kulemadok yonɗa Balabas bikabune uguk, kan yodapmaune Jesu kiyegelep dendemniti utubukadakaan kolonɗabek folon utne nagi ugiŋ.

Jesu kudi mu titiŋ timiŋgiŋ
(Matiyu 27:27-31; Jon 19:2-3)

¹⁶ Undun tubune memik hekidi nagila foon woon gapman’walaŋ gimbahan ginen yowawaliwen ugiŋ. Unon uune mikme hogohogok bunɗa bopnegiŋ. ¹⁷ Bopneen mapme diniŋ tinahukut giminiŋ tinahukulimiŋgiŋ.

En mundendemdi gwaikelemadiŋa mapme kulun welewele tiŋa mebi folon mokomiŋgiŋ.

¹⁸ Undun timiŋa kahaŋinda tiŋa indiŋ niŋgiŋ, “O Judame heki’walaŋ Mapme! Ganintiloyam!”

¹⁹ Undun niŋa kuyaŋdi ki folon ukiŋ, ula maluluk suwambali mulelem tikamanɗamana timiŋgiŋ.

²⁰ Nemenemek u timindapmaan tinahukut giminiŋ u kwihikulimiŋa ne’walaŋ dahidahidi kotigon tinahukulimiŋa kolonɗabek folon utne nagi ugiŋ.

Jesu kolon dabek folon ukiŋ
(Matiyu 27:32-44; Luk 23:26-43; Jon 19:17-27)

²¹ Talipmen woon me niŋ wou Saimon, Sailini yokwetneŋniŋ, Alesanda dut Lufus

behik, adi yokwet wapumnen fowe buguk, kan mikme hekidi ningigineune Jesu tubulodan kolondabeknin bemguk. ²² Bembune Jesu nagila kwet wou nin Golgata unon wosuwagin. (Kwet wou u mebi inde'wala mede folon me mebi kitili.) ²³ Unon woon wain ime haguwo* gut minobuna nawek yo mingin ingon adi mu naguk, ²⁴ kan kolondabek folon ukin. Ula mindan dahidahinin u titindok yona kat kugin. ²⁵ Nain kilok hanin kolondabek folon ulana ²⁶ kudi indin youla kolondabek ki folon ukambiyakin, "Judahi'wala Mapme."

²⁷ Kubome lufom maan kolondabek folon widi-hiyambiyakin, noli kohon didimeninjenkade en noli kohon kapmadinenkade. ²⁸ Undun tigin kan koom Youkudip mede ginen kadakanin titin dut kumumbaak youkin undugon foloon mintaguk.

²⁹ Kan metam kalakapmeen wonambunat tina Jesu kan mebigugun tina indin ninfokogin, "Da dibek ale Silonyot uyakula helebufa lufomkulitnin maanen kotigon makufulawe yogun, ³⁰ kamin kolondabek folon debek fobu gabune! Detina da folooge mu tubulodalan!"

³¹ Kan Silonyot dinin talitimen wapuhi en Yodoko Mede hinale heki adi maan nehi unon indin yona ninfoko tigin, "Metam noli kadem yehitubu-lodayauguk ingon ne foloon i debek ti mu tubulodalak on. ³² Du Kilisto, Isilaehi indi'wala mapme biyagon nobu hatiliwen kan kolondabek folonnenin debek foune

* 15:23: Wou "mel" yoin."

gabunja nadisukilitigamnim.” Meyat lufom fuku-fukun widihiyambiyakin adi maan undugon Jesu ninfoko tugumuk.

Jesu kumunguk

(Matiyu 27:45-56; Luk 23:44-49; Jon 19:28-30)

³³ Undun hatimilune mele lekingon tuguk, kan kwet wanakan mambip tubudapmaan halune woon 3 kilok tuguk. ³⁴ Kan gibita kutifiyeen indin yoguk, “Eloi, Eloi, lama sabatani.” U indi’wala mede folon indin, “Bepanne, Bepanne, mangonde binabulan?”

³⁵ Metam unon yakin adi mede u nadin no-lidi indin yogin, “Kei! Adi Ilaija bidak kutinilak.” ³⁶ Undun yona me nin kiyaneen woon imengwan yage wou “spans”† u tina wain ime buukaan ginen kupmaune sinintaune tina kusek diki folon ibikilitina Jesudi dundupnawek yona mami folon kameen me nolinije indin yeninguk, “Agan wabinene Ilajadi biyagon nobu buna tubulodau foun kanim ale.”

³⁷ Undun yayolu nai unaningon Jesu yakawe wapum toja kumunguk. ³⁸ Kumumbune Silonyot maanen haule bulubuluyen kakan wodihep tuluguk u wahin dikinen tububihila lekingon hinek tawatafoon dikinen tawadapmaguk.

³⁹ Kan mikme heki’wala talitimenhik kolondabek heben folon yakuk adi Jesu kumunjin u kanadin yoguk, “Biyagon hinek, me i adi Bepan mihinjin hinek.”

† **15:36:** “Spans” won adi imengwan maanen yage ikiin dinin wou. Ala yage u mateles dabugon kulakulayehi doktina ime ginen fulaune ime yage wendok ginen sininta tilak.

⁴⁰ Kan tamwoi noli-kabe kweetningon yali nemenemek mintaguk u kagin. Maliya Madala yokwetneņnin eņ Salome eņ Maliya Jems kuyanin dut Josep mehik adi tamwoi u bopne yakin adut nonņon yakin. ⁴¹ Tamwoi adi Jesudi Galili kwet yaugukneņ unon nonņon yaunila tubulo-dayaugin, eņ tamwoi noli u yakin adi maan Jesu dut Jelusalemde nonņon buņa hatigin hekidi yakin.

Jesu bom gineņ kamegin

(Matiyu 27:57-61; Luk 23:50-56; Jon 19:38-42)

⁴²⁻⁴³ Kwet tebele-daune Josep Alimatiyanin adi Judahi'walaņ kansol dinin me wapum nin ala hatihati kobut denin mintaune kakanđok wendok nadiņa woom hatiluguk. Ala Sabat gulet halon itnim yonņa tiulidoko tulune me i Jesu foloon dabaan tinņa woon bom gineņ kamewene munta mu tinņa fafaņe tinņa Pailat'walaņ loon ninadiguk. ⁴⁴ Kan Pailat adi Jesu agan kumunguk u mu nadi hakuk ala Josepdi loon nimbune nadiņa sukule tinņa mikme heki'walaņ me wapum nin kutinimbu buguk, buune Jesu abe kumunak be mon yonņa ninadiune ⁴⁵ kahat timimbu nadiguk. Nadiņa Josep Jesu foloon dabaan kedem tinņa wek ⁴⁶ nimbune Josepdi woon haule fafau nin tuwaan tinņa woon Jesu foloon dabaan kolonđabek folon yakuk u kibidali tinņafoguk, foon hauleđi tumula tinņa woon bom kawade maaneņ wamukin gineņ kameguk. Kameeņ kawade nin dekeleune buņa bom mami tehep tuguk. ⁴⁷ Maliya Madalanin dut Maliya Josep yakat mehik adi maan unon yayabulune Jesu foloon dabaan kamegin.

16

Jesu pilakuk

(Matiyu 28:1-10; Luk 24:1-12; Jon 20:1-10)

¹ Sabat nai dapmaune Maliya Madalanin en Salome en Maliya Jems min adi Jesu foloon dabaan yougomdok yon haguwo mundunhinit momohi noli tuwagin. ² Ala Sonda hanin mele labulabude Jesu bomnin ginen ugin. ³⁻⁴ Talipmen woon kawade malabumun bom mami tehegin u nediyendi siloneyembek yon nehi ungon yonadibedi titaugin. Undun yotawoon kalune kawade u wapum kakaan hinek ingon agan siloneune hamap yakuk.

⁵ Undinin kan tamwoi adi wodapmaan bom maminen wo kalune mekuya nin didimenin nenkade tinahukut fafau tin ikuk, tamwoi adi u kan sukule tigin ⁶ kan indin yeninguk, “Hidi munta mu tinen. Hidi Jesu Nasaletnin kolondabek folon ukin u lohiin u agan nadilat. Adi agan pilalak, kwelikon hogok i kanen.” ⁷ Undun yeninga yoguk, “Mede i tin woon mihiniye yeninen, tin Pita maan ninen. Jesu agan Galilide timen ulak, ale hidi koom haninguk undun unon woon kaneen.”

⁸ Undun yenimbu tamwoi adi boho tin hehele tigin, tin kiyane hogok ugin. Tin munta maan tigin doktin nebek nemu woon yeningin.

Jesudi Maliya Madalanin mintaminguk

(Jon 20:11-18)

⁹ Jesu kumun ginenin pilali Sonda hanin timen Maliya Madalanin mintaminguk. Tam u koom

yabap 7 yehikeleminguk. ¹⁰ Kañ adibo woon mihinjiye makat hakokin u yeninguk, ¹¹ “Jesu agañ kaikaan pilalak kañ agañ kañ bulat.” Undun yeninguk kañ mihinjiye adi medenij u mu nadisukilitigin.

Jesudi mihinjiyat lufom mintayemguk
(Luk 24:13-35)

¹² Jesu adi Maliya Madalanin mintamina kotigon mihinjiyat lufomuk Jelusalem binja yokwet nin udene ulu namandap nin ginen mintayemguk. ¹³ Undun tubune wabinja udaneen buja mihinjiye noli yeningumuk, ingon adi medehik u nadiune yalan tuguk.

Jesudi mihinjiye 11 mintayemguk
(Matiyu 28:16-20; Luk 24:36-53; Jon 20:19-23)

¹⁴ Mindan hinek mihinjiye wanakan nanane hanalu mintayemguk. Tina kumon ginenin kaikaan pilali metam mintayembune kañ buja yeningin ingon welehik tehekilitina medehik mu nadisukilitigin wendoktina mede fapanengon yenintoguk. ¹⁵ Tina indin yeninguk, “Hidi kwetkwet woon metam hogohogok Mede Mo-moon yenhautaneen. ¹⁶ Nebek nindi nadisukiliti tina Imeyout tibaak adi Bepandi tubulodawaak. En nadisukiliti mu tibaak adi Bepandi kwet kadakanin ginen uundok nindapmawaak. ¹⁷ Nadisukilitihinit adi Bepandi saninin yembune nu wotnene yona yabap yehikeleneen, en mede gitipmuhi yoneen, ¹⁸ en mingembet yohoneyaneen be ime upmunnit nayaneen ingon mu yehitubu-kadakaluwaak, en kohohik me

yagithinit foloohik folonj kameune kedebayaaneej.”

¹⁹ Wapum Jesu adi mede undun yeniŋa kunum gineŋ loguk. Loonj Bepan kohon didimeniŋnenkade itak. ²⁰ Undun yeniŋa loune mihiniye adi kwetkwet wooŋ Mede Momoon yohautagiŋ, kan Wapum ne adut kwanai nonŋon tigiŋ. Undun tiŋa medehikdi biyagonj mintadok yonja kudi titindok saŋiniŋ yemguk.

**Bepaŋ'Walaŋ Folofolok Kobuli
Genesis, Exodus, Psalms, and the New Testament in
the Numanggang Language of Papua New Guinea
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files dated 9 Oct 2020

217908e9-ce08-5ac3-9947-124c48579a74